

Baraen Douk Jisas Krais Nakrip Jon-enyi

*Banenyi Baraen Um Enenyenen Jisas Krais
Neyabig Jon Um*

- 1:1-8 Jon kabi nanabek yomnis um aria natik eneshenesh eshudok aria nowem enyudok baraen 7-poreis awiros um Iruhin ananish arpesh aria natuk Jisas Krais ananin nyeigur nyato iruhw.
- 1:9—3:22 Jon natik Jisas Krais natrugun abom aria ananin baraen nyanam eshesh sabaishi Kristen shape 7-poreirub warub iri.
- 4:1—8:1 Jon natik iruhw heven aria natik Jisas Krais nani ananin Yaken Iruhin, hani sabaishi enselahos aria natik Jisas nakweshih 7-poreis kendelis gris douk soweshik apudok shup douk shadareshap iri.
- 8:2—11:19 Jon natik 7-poreish enselahos atin atin shasuhw aruruh aria shahaprisharuh
- 12:1—13:18 Satan ta nini Iruhin ananish sabaishi enselahos shurpak aria shuhiyahan nugruki agundok atap
- 14:1—15:8 Jon natik Jisas natogur kabi douk nugaen sipsip um aria nani bishatin enselahos shabo eshudok arpesh douk shakon agabus abom Iruhin iri
- 16:1-21 Jon natik enesh kupaishi 7-poreish enselahos. Eshesh atin atin shasuhw marus.

17:1—19:21 Iruhin ta nuwanamesh yoweishi inahos eshudok arpeshe shape wabur Babilon shenekesh iri, aria Kraish ta nutogur kabi douk arman netem shigorihwinyi hos um aria nunaki.

20:1-15 Satan ta nunuweshik nupeik namudok agudok gagari nuwag gabuh gani atap iri nuwag aria Iruhin ta nunek skelimaguk ihishmorim arpeshe ba iyoh

21:1-27 Namuburi wabur Jerusalem

22:1-6 Worubibar abar bani shuruwepigos rowos douk ta arpeshe shishoh aria shupe wosik abom ihih nyumneh iri.

22:7-21 Jisas Kraish ananin nyatuh iri barae douk nahwar sabaishi arpeshe um shunakumori anan.

Baraen Jon Nenyem Nyakri Um Okwudok Buk Iri

¹ Seiwok enyudok barae um Jisas Kraish nyanabeshuk. Aria douk abudok nyutob enyen nyatogur yopugunum. Iruhin douk nakon enyudok barae Jisas um nukrip shenek Iruhin ananin mour iri um nuyabigesh um shanabeshuk iri eshudok eneshenesh hurukatin um shutogur. Anan douk neyabigap namudok. Anan neshopoki ananin ensel nyanakumori eik Jon douk yenek Iruhin ananin mour iri aria nyakripe enyudok barae. ² Aria eik yatik eshudok ihishmorim eneshenesh jurug aria eik yawereh enyudok barae yakripep yopugunum. Enyudok barae douk Iruhin ananin nyani enyudok adurin barae Jisas Kraish nakripepenyi.

³ Enyudok baraeen nyetem okwudok buk iri douk nyakrium eshudok douk ta shutograri iri. Aria ihishmorim arpesh douk shutarih enyudok baraeen debeg um kupaishi shumneken iri, eshesh wosik shanadudareh. Aria eshudok douk shumneken aria shusuhwen dodog shugipeshen iri eshesh shopunek douk shanadudareh. Um maresh? Abudok nyutob um eshudok ihishmorim shutogurum douk banaki hurukatin.

Baraeen Jon Nenyem Nyunam Iruhin Ananish Arpesh Shape 7-poreirub Warub Iri

⁴⁻⁵ O ipak Iruhin ananishi arpesh pape arbudok 7-poreirub warub douk bape shokugi nahobig Esia iri. Eik Jon yenekumepogu apudok shup ipak. Eik yakri Iruhin douk seiwok nape, aria kweipon shopunek ta nupe arigaha hugiguk iri nyumnah hutograri nutaurumep meyoh. Aria anan nutaurumep pupe dodogowip aria ipakiruh aparuh hur wosik. Aria shopunek, yakri eshudok 7-poreish yopishi mishish^{1:4-5}douk shape hurukatin um Iruhin ananin debeinyi wagitur iri shuni Jisas Kraishopunek shutaurumep meyoh aria ipakiruh aparuh hur wosik. Jisas Kraish douk neyotu dodogowin atun nagipesh ananin baraeen wosik iri nakripep ihinymorim Iruhin ananin adurin atinyi yopinyi abom baraeen. Aria sagramatin Iruhin narik nohur anan nakutukuk wonugwehw aria watak nakitak nape. Aria anan douk

^{1:4-5} **1:4-5** Enesh shakri eshudok 7-poreish yopishi mishish douk shakri um Iruhin ananin Mishin.

abom nape debeini um ihim-morim debeimi king douk hape agundok atap iri.

Anan douk urkum manawashamap aria ananibor owishibor botourak babuh aria bokweshihap aria mape wosik um eneshenesh apakish yoweishi inahos. ⁶ Aria douk anan nenekap mape debeipi um sabaishi arpesk kabi douk king-omi um. Aria shopunek, anan nenekap mape pris kabi amam seiwok hape henek ofa um eneshenesh eshudok hako Iruhin iri um. Aria apak munek mour um Iruhin douk Jisas Kraiss nenek lotuman iri. Aria anan shopunek douk ananin Yain. Aria eik yakri debeinyi nyeigurnyuni ihinyumorim dodog abom shupeum anan atun ihih nyumneh! Adur atin.

⁷ Ipak tik! Anan ta nini orug nunaki. Aria ihishmorim arpesk shuni eshudok douk seiwok shan nagok iri ta shutrun esheshis nabes. Aria ihismorim debeisi awirosish arpesk douk shape agundok atap iri ta shurepan abom. Adur atin eshudok ta shutogur namudok atin. Adur atin.

⁸ Aria debeini dodogowini abom Iruhin douk seiwok nape, aria douk shopunek nape, aria kweipon ta nunaki iri nakri namudok, "Seiwok baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek, abudok nyutob ihishmorim eshudok shunak shutuhuk um eik ta ipe."

Jon Natik Kraiss Douk Iruhin Nagraehan Neshopokan Nanaki Iri

⁹ Eik ipakin ashuken Jon douk yani ipak munoprom Jisas atun iri. Eik douk yani ipak

memnek eriger aria meyotu dodogowip um musah enenyenen amaen douk ta nyutogrupap iri. Aria douk shopunek, eik ta ini ipak um muwish agundok Iruhin nape Debeini um ananish arpesih um. Eik douk yakripesh Iruhin ananin baraan nyani enyudok adurin atinyi baraan um Jisas. Douk namudok aria eshesh shasuhwe sharawe shanaki sheyosop yapeik enyudok unai nyeigurinyum Patmos iri. ¹⁰ Anah nyumnah douk apak apa mape munek lotu um Debeini ahi, Iruhin ananin Mishin nyatogrume dodogowin atin aria nyeyabige eshudok yatrish kabi yabo yomnis yatrish um. Aria yemnek anah debeihi mah agabiwe um kabi douk shahapur oruhw um. ¹¹ Aria enyudok arpen nyeyagwrehi iri nyakripe nyakri, “Nyak wem eshudok douk ta nyutrish iri anap shup aria nyukeshop punak um Iruhin ananish arpesih shape arbudok 7-poreirub warub iri. Nyeiguhwirub um warub douk arbudok. Efesus, Smerna, Pergamum, Taiataira, Sardis buni Filadelfia iri Laodisia.”

¹² Aria eik yatanam um itik enyudok douk nyakripe enyudok baraan iri aria yatik 7-poreish eshudok shenekesh gol iri shatao. Eshesh douk shenekesh um showem lamhos shetem um. ¹³ Aria anan arman neyotu orokohun um eshudok 7-poreish shenekesh gol iri. Anan nor anah rouhi rupah habuh heyawiamokuk ananiruh yeriweruh aria nawashak anat let douk shenekat gol iri um ananin mishin. Anan douk kabi Anudok Arman douk natogur adurinyi arpen iri um. ¹⁴ Aria ananig barag douk gatogur shigorihwig abom kabi ehirub douk batogur

sipsip iri o kabi shigorihwisi ais um. Aria ananis nabes satrugun kabi douk debeihi nyih hanu aria bogaragun um. ¹⁵ Aria ananiruh yeriweruh hatrugun abom kabi enyudok brasin kapa iri um douk shashainyeh debeihi nyih aria nyatrugun um. Aria ananish mah heyagwreh debeg kabi worub batogur banaki um. ¹⁶ Anan nasuhw 7-poreiyu unib um ananin yopunyi rogur, aria anat wanohwiti bainat douk wanohwit eresit wobuwobur iri tatograri ananish nokwat. Aria ananish yamag bogagrag abom kabi wah hatao yumnah iri hatrugun um.

¹⁷ Douk yatron aria yanak yabuh yakus hurukatin um ananiruh yeriweruh kabi anan nagok iri arman um. Aria anan nowem ananin yopunyi rogur eik aria nakripe nakri, “Nyak mare nyunogugur, uwok! Eik douk seiwok baugos um ihishmorim eneshenesh eshudok watak enesh shupe uwe aria eik yarig yape. Aria kweipon shopunek abudok nyutob ihishmorim eshudok shunak shutuhuk um, eik ta ipe. ¹⁸ Eik douk madae igok iri uwe, uwok. Eik yape iri! Seiwok yagok aria douk yape, aria shopunek ta ipe ihish yumneh. Aria eik douk yarao debeinyi big aria dodog um ipe debeiwe iri um agundok arpesh shugok um. Um ikri eshesh shunak um yoweiburi wabur o shunak um yopuburi.

¹⁹ Douk namudok aria nyak wem eshudok iganigadae nyatrish iri shunish eshudok douk shape shatogur agundok atap iri shunish eshudok douk ta kweipon shugiguk shutograri iri nyakip shup. ²⁰ Aria baugenyum baraden riguk nyan-abeshuk um oudok 7-poreiyu unib douk nyatik

yasuhwo eikin yopunyi rogur iri douk namudok. Oudok unib douk wagraeh um 7-poreish enselahos douk shape sheyoh Iruhin ananish arpesh shape arbudok 7-poreirub warub iri. Aria baugenyum baraen um eshudok 7-poreish shenekesh gol iri um shuwem lamhos um douk nyakrium Iruhin ananish arpesh douk shape arbudok 7-poreirub warub iri.”

2

Baraen Nyanak um Iruhin Ananish Arpesh Shape Efesus Iri

¹ Aria Jisas ta apa nakripe nakri, “Jon, nyak wemen enyudok baraen anap shup nyunak um enyudok ensel douk nyape nyeyoh Iruhin ananish arpesh shape Efesus iri. Eik Jisas eikin baraen douk enyudok. ‘Eik douk yasuhw 7-poreiyu unib eikin yopunyi rogur aria yape yaraen orokohun um 7-poreish eshudok douk shenekesh gol iri um shape showem lamhosum iri yenekumepogu enyudok baraen ipak. ² Eik yadukemesh um ihimorim aih hani enyudok debeinyi mour ipak pape peneken iri. Aria yadukemep um agundok peyotu dodogowip atip um enenyenen amaen douk nyatogrump iri. Aria ipak pakri uwok abom um eshudok shenek yoweihi aih iri arpesh. Aria shopunek, yadukemep um ipak douk pokwiraeh amudok armam douk henek rohwa hakri amam douk aposel douk hakripesh Iruhin ananin baraen iri. Aria ipak padukemam um amam douk madae aposel omi uwe, uwok. Amam douk henek rohwumesh iri. ³ Aria

shopunek, eik yadukemep um agundok arpush shatrip um pasuhw eikin baraan pagipeshen um aria shenek yoweih aih um ipak um. Aria ipak peyotu dodogowip aria madae juwehosip uwe. Aria shopunek, eik yadukemep um ipak douk madae arigeh hep um punek enyudok debeinyi mour um pugipesh eik um uwe, uwok. Ipak peyotu dodogowip atip.

⁴ Aria douk eik yakri ikripep enen baraan um eshudok yoweishi inahos douk ipak pape penekesh iri. Sagomatin ipak urkwip panawashame dodog abom aria pagipeshe. Aria douk uwok. ⁵ Aria eik yakri ipak urkwip purum agundok riguk ipak papeum. Sagomatin ipak pape wosik, aria douk ipak patu pagrukuk rougunum. Ipak urkwip douk madae punawashame dodog uwe, uwok. Aria douk eik yakri ipak ta pukutukuk ipakish yoweishi inahos aria watak putanam puke aparuh eik. Aria ipak urkwip punawashame dodog abom kabi sagomatin ipak urkwip panawashame um. Uwok um, eik ta inaku itukuk ipakin enyudok douk shape showem lam um agundok douk enyen nyape nyataum. ⁶ Aria douk ipak watak panasuhw ehudok yopihi aih abom um pakri uwok um ehudok aih douk apudok awirop douk shanahwar um Nikola^{2:6}iri shenekesh iri. Eik shopunek douk yakri um uwok abom.

⁷ Aria douk ipak arigos sapenyep iri ta

2:6 **2:6** Apudok awirop Nikola apa shani eshesh Kristen shape Efesus bani Pergamum iri shape shenek lotu. Aria eshesh apa shenek skulumesh um shunek eneshenesh yoweishi inahos.

pumnek enyudok baraden Iruhin ananin Mishin nyakrip ananish arpesh-enyi aria pusuwen dodog pugipeshen! Eshudok arpesh douk shiy-otu dodogowish atish shunek wanohw shubo yoweinyi nyubuhuk iri, eik ta ikesh yopinyi big um eshesh shuwok epudok shurkwip douk peir enyudok rowog douk nyatao Iruhin ananig nahobig ganahwar um Paradais iri. Aria eshudok arpesh shuwok epudok shurkwip iri ta shupe wosik abom ihih nyumneh.’ ”

Baraden Nyanak Um Iruhin Ananish Arpesh Shape Smerna Iri

⁸ Aria Jisas watak shopunek nakripe nakri, “Jon, nyak wem enyudok baraden anap shup nyunak um enyudok enyel douk nyape nyeyoh Iruhin ananish arpesh shape Smerna iri. Eik Jisas eikin baraden douk enyudok. ‘Seiwok baugos um, ihishmorim eneshenesh eshudok watak enesh shupe uwe aria eik yape. Aria kweipon shopunek, abudok nyutob ihishmorim eshudok shunak shutuhuk um, eik ta ipe. Douk seiwok shae yagok aria douk watak yakitak yape. ⁹ Eik douk yadukemesh um enenyenen amaen douk nyatogur um ipak iri. Aria shopunek, yadukemesh um ipak eneshenesh eshudok wokep. Aria uwok. Ipak douk pogrem sabaishi yopishi eneshenesh eshudok shakusumep iruhw heven. Aria eik douk yadukemesh um enyudok yoweinyi baraden douk eshudok arpesh douk shenek rohwmep shakripepen iri. Eshesh shakri eshesh douk Juda aria eshesh madae Juda abom uwe, uwok. Eshesh douk Satan ananish.

¹⁰ Aria ipak mare punogugur um enenyenen amaen douk ta nyutogrumep aria nyunekep pumnek debeiri eriger iri. Ipak pumnek! Satan ta nunek anep punak punuweshik pupe um nukwiraehep punek yoweishi inahos. Aria ipak ta pumnek eriger banab nyutob meyoh kabi 10-poreih nyumneh meyoh um. Douk enesh shukri shep pugok um, ipak ta pusuhw eikin yopinyi baraen dodog aria piyotu dodogowip atip. Aria eik ta ituk ipakish nyeiguhw shuto iruhw aria ta inekep pupe wosik ihih nyumneh. Eik ta itaurumep pupe wosik.

¹¹ Aria douk ipak arigos sapenyep iri ta pumnek enyudok baraen douk Iruhin ananin Mishin nyakrip ananish arpesh enyi aria pusuwen dodog pugipeshen! Eshudok arpesh douk shiyotu dodogowish atish shunek wanohw shubo yoweishi inahos shubuhuk aria eshesh ta mare shugok anah shopunek,^{2:11}uwok.’ ”

Baraen Nyanak Um Iruhin Ananish Arpesh Shape Pergamum Iri

¹²⁻¹³ Aria Jisas nakripe shopunek nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Pergamum iri. Eik Jisas eikin baraen douk enyudok. ‘Eik douk yasuhw atudok wanohwiti bainat douk wanohwit wobuwobur iri yenekumep-ogu enyudok baraen ipak. Eik douk yadukemesh um ipakibur wabur. Satan

^{2:11} **2:11** Jisas watak nutanamori ahi, shagok iri ta watak shukitak aria shiyotu um kwot. Aria eshudok douk madae shunek bilip iri uwe ta shunak um yoweiburi wabur aria ta shugok anah shopunek.

douk nape debeini um ipakibur wabur. Aria eik yadukemep um ipak pasuhw eikin baraan dodog pagipesh eik atuwe. Aria eshesh shabo anudok yopuni arman Antipas douk nasuhw eikin baraan dodog abom nakripeshen iri nagok ipakibur wabur douk Satan napenyabur. Aria abudok nyutob eshesh shan nagok um, ipak shopunek peyotu dodogowip aria madae pukri punyukur-ukuk eikin baraan uwe, uwok.

¹⁴ Aria douk eik yakri ikripep enen baraan ipak um enesh yoweishi inahos douk ipak pape penekesh iri. Ipak anep douk wata pasuhweh dodog ehudok Balam ananah yoweih aih. Ananah aih douk ehudok. Seiwok anan neyabigan ehudok yoweih aih Balak aria Balak nenek rohw um eshesh Israel shenek yoweishi inahos um shakonuguk agabus Iruhin. Balak douk nakripesh shawok eshudok mahish iri worigun douk sharik shenek ofamesh shako amudok madae adurimi god omi iri uwe. Aria shopunek, nakripesh shenek wehrur um. ¹⁵⁻¹⁶ Aria douk shopunek namudok atin. Ipak anep douk pasuhw ehudok yoweih aih ehudok apudok awiropish arpesh shahwaresh um Nikolas2:15-16iri esheshih. Douk namudok aria ipak ta pukeshuk agabus yoweishi inahos ipak pape penekesh iri aria watak putanam pukon aparuh Iruhin. Uwok um, eik ta hurukatin um inaku aria ini eshudok douk shagipesh ehudok eshesh Nikolas esheshih aih iri murpak. Aria ta ikumesh atudok bainat douk tatograri

2:15-16 **2:15-16** Putik futnot nyape Revelesen 2:6 iri.

eikit nokwat iri. ¹⁷ Aria douk ipak arigos sapenyep iri ta pumnek enyudok baraan Iruhin ananin Mishin nyakrip ananish arpesh-enyi aria pusuwen dodog pugipeshen! Eshudok arpesh douk shiyotu dodogowish atish shunek wanohw shubo yoweishi inahos shubuhuk iri, kweipon eik ta ikesh anagun worigun douk shahwara-gun um mana douk nyanabeshuk nyakus iri. Aria shopunek, eik ta iwem esheshish namushi nyeiguhw anabor shigorihiwi-bori utabor aria ta ikesh aburdok utabor eshesh atin atin. Aria kupaishi arpesh ta mare shudukem eshudok namushi nyeiguhw, uwok. Eshudok douk sharao aburdok utabor iri atish ta shudukemesh.' ”

Baraen Nyanak Um Iruhin Ananish Arpesh Shape Taiataira Iri

¹⁸ Aria Jisas nakripe nakri, “Jon, nyak wem enyudok baraan anap shup punak um enyudok ensel douk nyape nyataurum Iruhin ananish arpesh shape Taiataira iri. Eik Jisas eikin baraan douk enyudok. ‘Eik Iruhin ananin nuganin douk eikis nabes satrugun kabi debeihi nyih hanu aria bogaragun um. Aria eikiruh yeriwuruh hatrugun kabi enyudok bras kapa douk shishainyeh debeihi nyih iri nyatrugun um. Eik yenekumepogu enyudok baraan ipak.

¹⁹ Eik yadukem ehudok yopihi aih ipak pape penekeh iri um agundok ipak urkwip panawasham Iruhin nani kupaishi arpesh um. Aria pasuhw eikin baraan dodog pagipeshen aria douk penek yopinyi mour um putaurum sabaishi arpesh um. Aria shopunek, ipak peyotu dodogowip atip abudok nyutob amaen

nyatogrumeḡ um. Aria eik yadukemesh um ehudok yopihi aih douk ipak pape penekesh iri douk heshagrakuk ehudok yopihi aih riguk ipak parik penekesh iri.

²⁰ Aria douk eik yakri ikripeḡ enen baraen um eshudok yoweishi inahos douk ipak pape penekesh iri. Ipakish yoweishi inahos douk eshudok. Ipak pakri wosik aria pape patruk meyoh okwudok yoweikwi armatok Jesebel aria okwok douk kwani ipak kwape. Okwok douk kwenek rohw kwakri okwok douk onok profet douk kwakripeḡ Iruhin ananin baraen iri. Aria okwok douk kwenek rohw iri. Okwok kwenek rohw um eshudok shenek eikin mour iri kwakripeḡ shenek wehrur um. Aria shopunek, shawok agundok worigun douk shenek ofamogun um amudok madae adurimi god omi iri uwe. ²¹ Aria eik douk yakutukuk kwape anah nyumneh shopunek um yakri kwukeshuk agab okwokwish yoweishi inahos um agundok kwani kupaishi shenek wehrur um. Aria yakri watak kwutanam kwunakumori eik, aria uwok. ²² Douk namudok aria eik ta inekok kwishuh kwutuwatagun um kwumnek debeiri eriger. Aria ta eshudok arpeḡ douk shani okwok shenek wehrur iri mare shukeshuk agabus esheshish yoweishi inahos aria shatanam shunakumori eik um, eik ta inekesh namudok. Eik ta inekesh shumnek debeiri eriger abom. ²³ Aria shopunek, eik ta ibo eshudok douk shagipesh okwokwin baraen iri shugok. Eik ta inekesh namudok aria ihishmorim Iruhin ananish arpeḡ ta shudukemesh shukri eik douk yadukemesh

wosik abom um ihishmorim arpesk esheshish mishish aria aparuh shor shanak um. Aria eik ta iwanamep eneshenesh wosikumep atin atin um ihihmorim aih ipak pape penekeh iri.

²⁴ Aria douk eik yakri ikrip ipak anep douk pape Taiataira iri. Ipak madae pugipesh enyudok okwokwin yoweinyi baraen uwe. Aria shopunek, ipak madae pugipesh ehudok aih douk enesh kupaishi shahwareh shakri, "Satan ananik aih douk hanabeshuk atin abom iri." Aria eik ta mare watak ikripep enen kupainyi baraen shopunek um ipak pugipeshen iri, uwok. ²⁵ Aria eik yakri ipak ta pusuhw ehudok ihihmori yopihi aih iri baraen douk ipak paraen iri. Aria piyotu dodogowip atip arigaha eik watak itanamori.

²⁶⁻²⁷ Aria eshudok arpesk douk shugipesh eikim urkum aria shiyotu dodogowish atish shunek wanohw shubo yoweishi inahos shubuhuk arigaha esheshib nyutob um shugok um butogur um, eik ta inekesh namudok. Eik ta ikesh debeishi dodogowishi nyeiguhw um shupe debeishi um sabaishi arpesk douk shape ihigos nahobigos iri. Aria eshesh ta shupe debeishi shusuhw merikw-umesh namudok atin kabi douk seiwok eikin Yain neke debeinyi nyeigur aria yape debeiwe iri yasuhw merik um sabaishi arpesk um. Enyudok ta nyutogur kabi Iruhin ananin baraen douk nyetem ananik Buk iri nyakrium. Iruhin nakri namudok, "Anan ta nupe dodogowin atun abom aria ta nusuhw anam ainim butum aria nupe nusuhw merikw-umesh. Anan ta nunekesh kabi anan arman douk nawor marus shenekas annab iri

pupuwaros shokugun atugun um.”

²⁸ Aria eik ta ikesh okwudok unuk douk kwanahwar um shuduwi iri. ²⁹ Aria douk ipak arigas sapenyep iri ta pumnek enyudok baraeen Iruhin ananin Mishin nyakrip ananish arpesh-enyi aria pusuwen dodog pugipeshen!’ ”

3

Baraeen Nyanak Um Iruhin Ananish Arpesh Shape Sardis Iri

¹ Aria Jisas nakripe nakri, “Jon, nyak wem enyudok baraeen anap shup nyunak um enyudok ensel douk nyape nyeyoh Iruhin ananish arpesh shape Sardis iri. Eik Jisas eikin baraeen douk enyudok. ‘Eik douk yasuhw Iruhin ananish 7-poreish yopishi mishish^{3:1}shani 7-poreiyu unib aria yenekumep-ogu enyudok baraeen ipak.

Eik douk yadukemesh um ihihmorim eneheneh aih ipak pape penekeh iri. Arpesh shatrip um, eshesh shakri ipak madae pugok iri uwe. Aria uwok, ipak nubokadae pagok iyoh. ² Douk namudok aria ipak pikitak pukutukuk agundok ipak peshuh um. Aria ihihmorim ipakih yopihi aih douk ipak wata pasuweh iri, eheh douk hurukatin um hugok. Douk namudok aria ipak ta pikitak aria punekeh dodogowih abom atih. Um maresh? Eikin debeini Iruhin natik ipak penekeh iri aih jurug aria nakri eheh douk madae yopih uwe, uwok. ³ Douk namudok aria ipak wata urkwip purum enyudok baraeen douk seiwok ipak pemneken iri aria wata pugipeshen.

3:1 **3:1** Putik futnot nyape Revelesen 1:4 iri.

Aria putanam pukeshuk agabus yoweishi inahos aria wata punakumori eik. Uwok um, eik ta inaku kabi anan nakwuaruh iri nanakumagu aria ipak ta mare pudukemesh um abudok nyutob eik inaku itogrumep obi nyutob.

⁴ Aria ipak karowip pape Sardis iri madae pugipesh yoweih ai h uwe. Aria enyudok enyen douk kabi ipak madae punek ipakih rupeh hubosusih um uwe. Aria ipak atip ta pur ehudok shigori hwihi rupeh aria puni eik munak atugun. Um mares h? Ipak douk yopishi arpesh aria ipak douk wosik um puni eik munak atugun um. ⁵ Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta ikesh ehudokmori shigori hwihi rupeh shihur. Eshesh ta shihur kabi ipak karowip pape Sardis iri pehur um. Aria eik ta mare itorihuk esheshish nyeiguhw douk shatem okwudok buk douk eshudok arpesh ta shupe wosik ihih nyumneh iri esheshish nyeiguhw shatemokwi, uwok. Aria eik ta ikrip eikin Yain nini ananish enselahos yopugunum um eshudok arpesh ikri eshesh douk eikish arpesh. ⁶ Aria douk ipak arpesh arigos sapenyep iri ta pumnek enyudok baraan Iruhin ananin Mishin nyakrip ananish arpeshenyi aria pusuwen dodog pugipeshen.' "

Baraan Nyanak Um Iruhin Ananish Arpesh Shape Filadelfia Iri

⁷ Aria Jisas nakripe nakri, "Jon, nyak wem enyudok baraan anap shup nyunak um enyudok ensel douk nyape nyeyoh Iruhin ananish arpesh

shape Filadelfia iri. Aria eik Jisas eikin baraeen douk enyudok. 'Eik douk yopuweiri abom douk aria eikin baraeen douk adurin atin yasuhw ki^{3:7}um atudok wit douk seiwok King Devit nasuwen iri. Aria ta eik ijik wit um, ta mare enen arpen dodogowin um nyutaru. Aria shopunek, ta eik itaru um, ta mare enen arpen dodogowin um nyijikat. ⁸ Eik douk yadukemesh um ihihmorim aih ipak pape penekkeh iri. Aria shopunek, eik yadukemesh um ipak douk madae dodogowip um punek eikin mour wosik um uwe. Aria ipak pagipesh ihinyumorim eikin baraeen aria madae pubeshuk eikin nyeigur uwe, uwok. Aria ipak tik. Eik yejik anat wit tanejik tapeimep. Aria ta mare enen arpen dodogowin um nyutaru, uwok. ⁹ Aria ipak pumnek! Ipak douk padukemesh eshudok Satan ananish arpesh. Eshesh shenek rohw shakri eshesh douk Juda, aria eshesh douk madae Juda abom uwe. Eshesh douk shenek rohw iri. Douk namudok aria eik ta inekesh shunaki shubuh shuduk ohrubus hurukatin um ipakiruh yeriweruh. Aria abudok nyutob eshesh ta shudukemesh shukri adur atin eik douk urkum manawashamep ipak Iruhin ananish arpesh pape Filadelfia iri. ¹⁰ Ipak douk pagipesh eikin baraeen wosik peyotu dodogowip aria madae juwehosip arigas uwe um enenyenen amaen douk nyatogrumeperi. Namudok aria abudok nyutob eneheneh kwiraeh hutogur um

^{3:7} **3:7** Enyudok baraeen nyakri Jisas Kraiss atun narao big um nukri meishi arpesh shuwish numun Iruhin ananibur namuburi wabur Jerusalem douk ta bukutukuk iruhw heven bubuhi iri (Revelesen 21:2).

hukwiraeh ihishmorim arpesh shape agundok atap iri um, eik ta itaurumep piyotu dodogowip atip aria pupe wosik.

¹¹ Aria eik douk hurukatin um inaku. Douk namudok aria ehudok yopuhi aih ipak pagipesheh penekeh iri ipak ta gamo pusuweh dodog. Ta wosik atin enesh kupaishi arpesh shutrip shuraoukuk enyudok ipakin yopinyi prais douk ta ipak puraen iri. ¹² Aria eshudok arpesh douk shiyotu dodogowish atish shunek wanohw shubo yoweishi inahos shubuhuk iri, eik ta inekesh shiyotu dodogowish atish kabi anohw urohwa douk hwatao hwosah eikin debeini Iruhin ananit debeiti urupat iri. Aria eshesh ta mare wata shukutukuk shutogur shunak, uwok. Eik ta iwem eikin Iruhin ananin nyeigur nyuni ananibur namuburi wabur Jerusalem ababurin nyeigur nyutem eshudok arpesh esheshiruh yegeshiweruh. Abrudok wabur ta bukutukuk iruhw heven douk eikin Iruhin napeum bubuhi iri. Aria eik shopunek ta iwem eikin naminyi nyeigur nyutem esheshiruh yegeshiweruh. ¹³ Aria douk ipak arigos sapenyepi um ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen.' ”

Baraen Nyanak Um Iruhin Ananish Arpesh Shape Laodisia Iri

¹⁴ Aria Jisas nakripe nakri, “Jon, nyak wem enyudok baraen anap shup nyunak um enyudok ensel douk nyape nyeyoh Iruhin ananish arpesh shape Laodisia iri. Eik Jisas eikin baraen douk adurin. Enyen douk enyudok. ‘Eik douk yeyotu

dodogoiwe atuwe abom yakripesh yopinyi abom wosik Iruhin ananin adurin atinyi baraeen iri. Aria eik douk baugos um ihishmorim eshudok eneshenesh douk Iruhin nenekesh shape iruhw atap iri shani ihishmorim arpesh. Eik yenekumepogu enyudok baraeen ipak. ¹⁵ Eik yadukemesh um ehudok aih ipak pape penekesh iri um pape penek eikin mour um. Ipak douk madae nyumanugasip abom uwe aria shopunek, madae juwehosip abom uwe. Aria eik yakri ipak ta nyumanugasip abom o juwehosip abom. ¹⁶ Aria uwok. Ipak madae juwehosip abom uwe o madae nyumanugasip abom uwe. Ipak juwehosip karowih atin. Douk namudok aria eik ta igugurukwep putograri eikit nokwat! ¹⁷ Aria ipak pakri, "Apak manabuk sabaibori utabor bani sabaishi eshudok eneshenesh. Apak madae yaruhish um enesh eshudok eneshenesh uwe." Aria ipak pape yowep abom. Aria arpesh ta shutrip aria shenek gihaumep. Eik yatrip um, ipak douk kabi yaruhish um eneshenesh yopishi eshudok iri um. Ipak kabi douk nabes seshukeshi arpesh um. Ipak kabi douk rupeh wokep aria pagor pape um. Aria ipak douk madae pudukemesh uwe. ¹⁸ Douk namudok aria eik yakri ikripep enyudok baraeen. Eikir gol douk debeihi nyih hanur aria henekar ratogur yopur abom. Douk namudok aria ipak putor arudok gol um, ipak ta putogur debeipari kabi shogrem sabaibori utabor iri um. Aria punator shigorihihi rupeh aria pihur um punoshigar ipakiruh yegeshiweruh um arpesh mare shutrip pugor pupe aria abraen nyupeyep, uwok. Aria

shopunek, ipak putor marasin aria punayok nabes um ipak wata putrugun wosik. ¹⁹ Eshudok arpesh douk eik urkum manawashamesh iri, eik ta ihesh um inekesh shutogur yopishi arpesh abom. Douk namudok aria ipak urkwip ta purum ipakih aih aria pukeshuk agabus yoweishi inahos aria pukon aparuh Iruhin abom. ²⁰ Ipak pumnek! Eik yeyotu wit aria yape yarigep. Aria meinyi arpen douk nyumneke aria nyijikume wit iri, eik ta iwish ini enyen upe numun. Aria ohwak ta upe uwok worigun atugun.

²¹ Aria eshudok douk shiyotu dodogowish atish shunek wanohw shubo yoweishi inahos shubuhuk iri, eik ta ikesh debeinyi nyeigur um shupe debeishi aria shuni eik mupe eikin debeinyi wagitur. Kabi douk seiwok eik yeyotu dodogoiwe yenek wanohw yabo yoweishi inahos shabuhuk aria douk yape debeiweiri yani eikin Yain wape ananin debeinyi wagitur um. ²² Aria douk ipak arigos sapenyep iri um ta pumnek enyudok baraen Iruhin ananin Mishin nyakrip ananish arpesh-enyi aria pusuwen dodog pugipeshen!’ ”

4

Shenek Lotu Um Iruhin Gani Iruhw Heven

¹ Douk enyudok nyanakuk aria eik yatik anat wit tanajik tape iruhw heven. Aria yemnek anah mah. Aria enyudok arpen nyeyagwreh debeg kabi shahapur oruhw-umori douk iganigadae yemneken nyeyagwrehi iri nyakripe nyakri, “Nyak nyutowi agundok iruhw aria

iyabigen eshudok eneshenesh douk ta shutogur iri.”² Aria ahudok atuh Iruhin ananin Mishin nyatogrume dodogowin atin aria yatigu enen debeinyi wagitur douk king-omi atum hapenyen iri nyakus iruhw heven. Aria anan arman nape enyudok wagitur.³ Anan natrugun kabi anam yopumi abom utom nyeigurim um jasper iri um mani kupaimi owishiborimi nyeigurim um konilian iri batrugun um. Aria enen renbo nyakus aria enyenyir yamuger rakih rananug enyudok debeinyi wagitur. Enyudok renbo douk yopin abom kabi anam yopumi grinporeim utom nyeigurim um emeral iri um.⁴ Aria 24-poreish debeishi wagiturahos shopunek shakus sherssharih um enyudok debeinyi wagitur. Aria anam debeimi armam 24-poreim hatem eshudok wagiturahos. Amam hore shigoriwhihi rupeh aria howem yopugwi hatog shenekog gol iri douk king-omi atum hogwem iri.⁵ Aria utag bogaragi gani enyudok debeinyi wagitur nyakus um aria utag brereyarog geyagwreh debeg. Aria hurukatin um enyudok debeinyi wagitur 7-poreish ourehish douk hanish atish iri shakus. Eshudok ourehish douk shakri wobuwobren baraen um Iruhin ananish 7-poreish yopishi mishish.^{4:5}⁶ Aria hurukatin um enyudok debeinyi wagitur, enen enyudok kabi douk debeigwi youg um nyakus. Enyen nyatrugun abom nyape kabi wenyir um. Aria eshudok 4-poreish dodogowishi eshudok douk mishish shoresh iri shape orokohun aria shape sherssharih um enyudok debeinyi wagitur. Aria sabaisi nabes sape ya-

4:5 4:5 Putik futnot nyape Revelesen 1:4 iri.

magosish um shani aparuhish um shani agabusish um. ⁷ Aria nyarik iri dodogowinyi douk mishin nyoren iri douk nyape kabi enen debeinyi wanohwinyi mahin nyeigurinum laion iri. Aria nyagiguk iri nyape kabi enen abonin bulmakau um. Aria binyatin iri enyenyig yamag gape kabi arpenyig yamag um. Aria nubatin-enyi nyape kabi anan debeini kumun nehuru nanak iruhw iri um. ⁸ Aria eshudok nubatish, eshesh atin atin douk anawipish kapraigiyohos shapenyesh. Aria numuniruh um hani adukiruh um esheshiruh yegeshiweruh ihiruhmorim douk shukniruh abom um nabes atus. Aria nyumneh weibus eshesh shapeum shakri,
 “Debeini Iruhin douk dodogowini abom.
 Anan douk yopuni abom, anan douk yopuni abom,
 anan douk yopuni abom.
 Seiwok nape, aria douk shopunek nape,
 aria kweipon shopunek ta nunaki.”
 Eshesh madae shupe um shurao uhwin atin um shakri enyudok baraen um uwe. ⁹⁻¹¹ Eshesh shape shatuk Iruhin douk nape enyudok debeinyi wagitur iri ananin nyeigur nyato iruhw. Anan douk nape ihih nyumneh iri. Eshesh shanadudareh-uman shenek tenkyuman shakri anan yopuni. Aria abudok nyutob eshudok nubatish dodogowishi douk mishish shoreshi shenekesh namudok um, amudok 24-poreim debeimi habuh hoduk ohrubus hurukatin um Iruhin douk nape wosik abom ihih nyumneh iri douk nape enyudok debeinyi wagitur iri aria hape henek lotuman. Amam honik amamig

yopugwi hatog douk king-omi atum hogwem
 iri hawashog hurukatin um enyudok debeinyi
 wagitur aria hakri,
 “Apakin debeini Iruhin, nyak douk
 dodogowinyi yopunyi abom.
 Aria ihishmorim arpesh ta shutuk nyakin atin
 nyeigur nyuto iruhw.
 Um maresh? Nyak nyagipesh nyakim atum
 urkum
 aria nyenek ihishmorim eneshenesh eshudok
 shatogur shape aria nyorukesh yapis.
 Eshesh douk nyakim urkum atum morumesh
 nyakriyesh
 aria eshesh shatogur shape.”

5

Jon Natik Onok Buk Douk Shaweshigok Iri

¹ Aria eik Jon yatik anudok arman douk
 natem enyudok debeinyi wagitur iri nasuhw
 onok buk ananin yopunyi rogur. Okwudok
 buk okwok douk kabi anap roupi shup um.
 Okwok douk shadareshok aria showeshigok.
 Aria baraen shenyem nyape numunik um kwani
 aduk shopunek. Aria showeshigok 7-poreih
 shakwu kendelis gris. ² Aria eik yatik enen
 dodogowinyi ensel nyape nyeyagwreh debeg
 nyakri, “Meinyi arpen douk yopin abom aria
 wosik um nyubahiguk asudok kendelis gris douk
 showeshik okwudok buk um aria nyukweshi-
 hok?” ³ Aria madae shutik enen atin arpen
 nyape iruhw heven iri o agundok atap iri o
 shakamum agundok atap iri douk ta wosik um
 nyukweshih okwudok buk aria nyutik numunik

um iri. ⁴ Aria douk yatik um madae shuparug enen arpen uwe douk wosik um nyukweshih okwudok buk aria nyutik numunik um iri. Douk namudok aria eik yereh debeg. ⁵ Aria anan um amudok 24-poreim debeimi nanaki nakripe nakri, “Kwamnek! Nyak mare nyureh! Anan arman um apudok awirop nyeigurip um Juda iri douk nakitak Devit ananip awirop iri douk dodogowin kabi enen wanohwinyi mahin nyeigurinyum laion iri. Anan douk neyotu dodogowin atun nenek wanohw nabo yoweishi inahos shani ihishmorim ananish horim shabuhuk. Douk namudok aria anan douk dodogowin aria wosik um nubahiguk asudok 7-poreis kendelis gris douk showeshik okwudok buk um aria nukweshihok.”

Jon Natik Enen Nugaen Sipsip

⁶ Aria yatigu enen Nugaen Sipsip nyeyotu hurukatin um enyudok debeinyi wagitur. Aria eshudok nubatish dodogowishi douk mishish shoresh iri shani amudok 24-poreim debeimi sheyotu sherssharih enyudok Nugaen Sipsip. Enyen nyubrug gwapenyen kabi shaen nyagok iri um. Enyen 7-poreiruh shuwaruh hakih enyenyig barag aria 7-poreis nabes sapenyen. Asudok nabes douk sakri wobuwobren baraen um Iruhin ananish 7-poreish mishish^{5:6}douk anan neshopokesh shanak ihigunmorim um agundok atap iri. ⁷ Aria enyudok Nugaen Sipsip nyanaki nyatrun okwudok buk anudok douk nasuok yopunyi rogur aria nape debeinyi

5:6 5:6 Putik futnot nyape Revelesen 1:4 iri.

wagitur iri. ⁸ Douk enyen nyatrunok aria eshudok nubatish dodogowishi douk mishish shoresh iri shani amudok 24-poreim debeimi shabuh shaduk ohrubus shakus hurukatin um Nugaen Sipsip aria shenek lotumen. Aria ihim-morim amudok debeimi hasuhw sisigish atish enesh eshudok kabi gitahas um shani anas dis douk shenekas gol iri. Asudok dis douk shuknis um enyudok paura douk enyenyigus nyugus seisik wosik iri. Enyudok paura douk nyakri wobu-wobren baraen um beten douk Iruhin ananish arpesh shape shenekan iri. ⁹ Aria eshesh shape sheyarub onohw namuhwi awehw shakri,
 “Nyak douk yopuni abom aria wosik um nyutrun

okwudok buk

aria nyukweshih ihismorim kendelis gris douk showeshigok um.

Um maresh? Eshesh shaen nyagok

aria nyakibor owishibor batourak bator

ihismorim awirosish arpesh

aria bakweshihesh shape Iruhin ananish atish.

Eshesh douk shape ihismorim sisigis debeisi

awiros

aria sheneyagwreh sabainyi kupainyi baraen iri.

Eshesh douk sabairuhi sisigiruh yegeshiweruh-

ish arpesh douk shape ihirubmorim de-

beirubi warub nahobigos

abudok amnab agundok atap iri.

¹⁰ Nyak douk nyenekam hatogur pris douk hape

henek ofa um

eneshenesh eshudok hako apakin Debeini Iruhin

iri.

Aria anan ta nupe Debeini nusuhw merikw-

umesh

aria kweipon eshesh ta shupe debeishi
 kabi douk debeimi king-omi
 aria shusuhw merik um ihishmorim arpesh
 shape agundok atap iri.”

*Eshesh Shatuk Nugaen Sipsip Enyenyin
 Nyeigur Nyato Iruhw*

¹¹ Aria wata shopunek yatrugunugu aria yem-
 neku eshudok sabaishi Iruhin ananish enselahos
 esheshih meh. Shadarehesh um douk shatogur
 sabaishi abom. Sabaibi tausenab bani sabaibi
 milionab. Eshudok sabaishi enselahos shey-
 otu shersharikh enyudok debeinyi wagitur nyani
 eshudok nubatish dodogowishi douk mishish
 shoresh iri shani amudok 24-poreim debeimi
 armam. ¹² Aria eshudok enselahos sheyarub
 debeg shakri,

“Enyudok Nugaen Sipsip douk seiwok shaen
 nyagok iri douk yopunyi abom.

Douk namudok aria enyen douk wosik um nyi-
 rao debeinyi nyeigur

nyuni utabor buni eneshenesh yopishi eshudok
 shuni debeinyi dodog.

Aria shopunek enyen douk wosik um nyurao
 yopinyi saki

aria wosik um apak mutuk enyenyin atin nyeigur
 nyuto iruhw.

Aria enyen douk wosik um apak munadudareh-
 umen abom aria mutuk enyenyin atin

nyeigur nyuto iruhw

aria munek lotumen.”

¹³ Aria eik yemnek ihishmorim eshudok douk
 Iruhin nenekesh shape iruhw atap iri shani
 eshudok douk shape shakam agundok atap iri

shani ihishmorim shape shakam debeigwi youg
 iri shape sheyarub onohw awehw shakri,
 “Apak makri ihishmorim eneshenesh eshudok
 shunadudareh um
 anudok nape debeinyi wagitur iri nini Nugaen
 Sipsip.

Aria shutuk esheshish nyeiguhw shuto iruhw
 aria shunek lotumesh ihih nyumneh.

Aria makri ihinyumorim debeinyi dodog nyuni
 agundok natrugun aria nape dodogowini
 um shupe um
 eshesh biyesh ihih nyumneh!”

¹⁴ Aria eshudok nubatish dodogowishi douk
 mishish shoresh iri shakri, “Adur atin!” Aria
 amudok 24-poreim debeimi armam habuh ho-
 duk ohrubus atap aria henek lotu um Iruhin nani
 Nugaen Sipsip.

6

Nugaen Sipsip Nyabrig Kendelis Gris Soweshik Buk Iri

¹ Aria yatigu Nugaen Sipsip nyohur okwudok
 buk douk shadareshok showeshigok 7-poreis
 kendelis gris iri nyasuok aria nyabahiguk sarig
 iri kendelis gris. Aria eik yemnek enen sago-
 matin um eshudok nubatish dodogowishi douk
 mishish shoresh iri nyeyagwreh. Aria enyenyih
 mah heyagwreh um kabi douk utag pogarog um.
 Aria enyen nyakri, “Nyak yowi.” ² Aria yatigu
 enen shigorihwinyi hos nyanaki. Aria anudok
 arman natem enyudok hos iri nasuhw enen
 kein. Aria shopunek, shakon anat yoputi hat
 douk eshudok arpesih douk shenek uhwinyum

wanohw iri shogur iri. Aria abudok nyutob anan natem hos nanak kabi anan nenek uhwinyum wanogwiruh aria nakri nunek onohw shopunek wanohw nunek uhwinyumoh iri. ³ Aria Nugaen Sipsip nyabahiguk sagiguk iri kendelis gris aria eik yemnek enyudok nyagiguk iri dodogowinyi douk mishin nyoren iri nyakri, "Nyak yowi!" ⁴ Aria yatigu enen owishiborinyi nyatrugun iri hos nyanaki. Aria anudok arman natem enyudok hos iri narao dodog um nuhur shape agundok atap iri arpesh esheshiruh aparuh um shurpak aria shubo kupaishi shugok. Aria shakon anat debeiti bainat.

⁵ Aria Nugaen Sipsip nyabahiguk binyatinyis kendelis gris aria eik yemnek binyatin-in enyudok dodogowinyi douk mishin nyoren iri nyakri, "Nyak yowi!" Aria eik yatrugunugu aria yatigu enen behrabinyi hos nyanaki. Aria anudok arman natem enyudok hos iri nasuhw enen skel douk shape shenek skelum eshudok eneshenesh um ananis wis. ⁶ Aria yemnek enen enyudok kabi douk enen arpen enenyih mah um. Enyen nyeyagwrehi agundok eshudok nubatish dodogowishi douk mishish shoresh iri shapemori. Aria enyudok nyeyagwrehi iri nyakri, "Nyak nyunak nyunek nyakin mour aria arpesh ta shugok um nyurub. Wit iri bali ta karowish atish aria ta shutoumesh um debeibori utabor. Douk namudok aria shunek mour atuh nyumnah shurabor iri utabor ta wosik um shutor atop shokupi marup um wit, o bias atop shokusi marus um bali kabi douk rais um. Aria agusudok rowos douk shape shenek wel-agos iri sani ago-

sudok douk shadi wainip shuruwep-agosi nyak mare nyununugos!”

⁷ Aria Nugaen Sipsip nyubahiguk nubatis kendelis gris soweshik okwudok buk iri. Aria eik yemnek nyagiguk iri nubatin dodogowinyi enyudok mishin nyoren iri nyakri, “Nyak yowi!”

⁸ Aria eik yatigu enen akitohini hos nyanaki. Aria anudok natemori enyudok hos iri ananin nyeigur douk nanahwar Gok. Aria anudok anan douk debeini nasuhw merik um abrudok wabur douk shagok iri shapenyaburi nagimani. Aria arpes shape agundok atap iri shenesiyao um nubatis awiros. Aria amam harao dodog um hubo anap awiropish eshudok arpes shugok. Enesh hakwumesh bainatog haesh shagok, aria enesh shagok um nyurub. Aria enesh yoweihi arugeh haesh aria shagok, aria enesh wanohwishi wanarish mahish shaesh shagok. ⁹ Aria Nugaen Sipsip nyabahiguk anas wisish kendelis gris soweshik okwudok Buk iri. Aria eik yatigu eshudok arpes douk seiwok abom shasuhw Iruhin ananin baraen dodog shakripesh um agundok Jisas nataurumesh um aria kupaishi arpes shaesh shagok iri esheshish mishish. Eshesh shape shakam enyudok alta douk shape showem eshudok um shenek ofamesh shako Iruhin iri um. ¹⁰ Aria eshesh shahwar debeg shakri, “Dodogowini Debeini, nyak douk adurinyi yopunyi abom nyasuhw iruhw atap iri! Ta makwunih nyumneh hunak hudiguk aria nyak kadak nyunekumesh kwotog agundok atapishi arpes um nyuwanamesh yoweishi inahos um agundok shabo apak magok

um?"

¹¹ Aria Iruhin nekesh rouhi shigorihiwihi rupeh um atin atin eshudok arpesish mishish aria nakripesh namudok nakri, "Ipak pupe pishuk-abar banab nyutob shopunek um arigaha shubo ipakish ashukenyish owashish douk shani ipak panuboum penek atin mour iri shugok kabi douk shabo ipak pagok um ba iyoh. Douk eshesh shesh shugok arigaha shunak shutogurum enyudok namba eik yakriyen iri aria eik ta kadak iwanom-umep ereb."

¹² Aria yatigu Nugaen Sipsip nyabahiguk anawipis kendelis gris douk soweshik okwudok buk iri aria debeikwi enyik kwatuk agundok atap. Aria nyumnahin aun natogur behrabin kabi anah yoweihi behrabihi rupah um. Aria wabin aun natogur owishiborin kabi owishibor um.

¹³ Aria unib wape iruhw utag iri wanatuk wagruki atap kabi enep watakipi fikip shuruwep douk dodogowinyi uhwin nyasusuep tutukarep pagruk-umori um. ¹⁴ Aria iruhw utag ganak gawishuk kabi shadaresh anap jarukwip um. Aria ihiruhmorim yodururuh hani unaihos shanak abom shapeik kupaigunum.

¹⁵ Aria amudok hape king um agundok atap iri hani anam debeimi nyeiguhw shatoumami, hani amudok debeimi hasuhw merik um ami iri, hani eshudok douk shanagrem sabaibori utabor bani jah iri, shani eshudok dodogowishi arpesish, shani ihishmorim arpesish douk shape shakamum kupaishi shenekumesh mour meyoh iri, shani eshudok douk shape wosik iri, eshesh ihishmorim shanak shawish shanabeshuk shape

hurupiruh hani debeiwordi burbudugiyu douk watao yodururuh iri. ¹⁶ Aria eshesh shahwar yodururuh hani debeibori utabor shakri, “Ipak pubuh pishapomapuk um anudok nape debeinyi wagitur iri um mare nutrup. Aria shopunek um pubeshukapagak um Nugaen Sipsip juwehosin um mare nyunekumap kwotog aria nyunekap muraio debeiri eriger. ¹⁷ Um maresh? Ahudok debeihi nyumnah um anudok nape debeinyi wagitur iri nini Nugaen Sipsip amam juwehosim um huwanamesh eneshenesh yoweishi inahos eshesh shape shenekesh iri um douk hatogur. Douk namudok aria omi ta dodogowin um nyunek uhwinyumam? Adur atin ta uwok.”

7

Sabaishi Israel 144,000-Poreish Sharao Iruhin Ananin Kak

¹ Douk enyudok nyanakuk aria eik yatru-gunugu aria yatigu nubatish enselahos sheyotu anagas um nubatin kona um agundok atap um agudok nahobig. Aria eshesh shasuhuk uhwin douk nyahur nubatin kona iri um mare nyahur agundok atap o nyahur youg o nyahur nyususuhw enen rowog. ² Aria wata yatigu kupainyi ensel nyatowi nyanaki iruhw gani aun nakihumori. Enyen nyasuhwi enen enyudok douk Iruhin nape abom ihih nyumneh iri ananin kak nyapeyenyi. Aria nyahwadesh debeg eshudok nubatish enselahos douk Iruhin nekesh dodog um shununu agundok atap nini youg iri. ³ Enyen nyakri, “Ipak mare arigas pununu agundok atap nini youg iri rowos, watak.

Apak makri muwem-umesh Iruhin ananin kak nyupe yomogos um eshudok arpesh douk shenek apakin Iruhin ananin mour iri ba iyoh aria ipak kadak pununu eshudok eneshenesh.”

⁴ Aria eik yemnek um shadareh eshudok arpesh douk sharao Iruhin ananin kak iri. Eshesh shadarehesh shanak shatogur sabaishi um 144,000-poreish. Eshudok sabaishi arpesh douk shanaki asudok ihismorim 12-poreis debeisi awiros um eshesh Israel. ⁵ Apudok awirop shahwarop um Juda iri, sharao kak aria shatogur 12,000-poreish. Aria apudok anap awirop shahwarop um Ruben iri 12,000, aria apudok shahwarop um Gat iri 12,000. ⁶ Aria apudok shahwarop um Aser iri 12,000, aria apudok shahwarop um Naptali iri 12,000. Aria apudok shahwarop um Manase iri 12,000. ⁷ Aria apudok shahwarop um Simeon iri 12,000, aria apudok shahwarop um Livai iri 12,000. Aria apudok shahwarop um Isakar iri 12,000. ⁸ Aria apudok shahwarop um Sebulun iri 12,000, aria apudok shahwarop um Josep iri 12,000. Aria apudok shahwarop um Benjamin iri 12,000. Asudok awirosish arpesh sharao Iruhin ananin kak.

Sabaishi Arpesh Shenek Lotu Um Iruhin

⁹ Douk enyudok nyanakuk aria eik yatrugunugu aria yatigu sabaishi sisigiruh yegeshiweruh-ish arpesh. Eshudok arpesh douk madae wosik um shudarehesh uwe, uwok. Eshesh douk ihismorim debeisi awirosish arpesh douk sheneyagwreh sabainyi kupainyi

baraen iri. Eshesh douk shanaki ihigomormim nahobigos douk sape agundok atap iri shantorum shape. Eshesh shore shigorihiwihi rupeh aria shasuhw palmenis shus esheshis wis aria sheyotu hurukatin um enyudok debeinyi wagitur nyani Nugaen Sipsip. ¹⁰ Aria eshesh shahwar debeg shakri,

“Apakin Iruhin douk nape debeinyi wagitur iri nani Nugaen Sipsip amam atum abom hanarap matanamori mape wosik.”

¹¹ Aria ihishmormim enselahos sheyotu shersharih enyudok debeinyi wagitur nyani amudok 24-poreim debeimi hani eshudok nubatish dodogowishi douk mishish shoresh iri shabuh shaduk ohrubus hurukatinyum enyudok debeinyi wagitur aria shape shenek lotu um Iruhin.

¹² Shakri,

“Adur atin! Apak manadudareh um apakin Iruhin

aria matuk ananin nyeigur nyato iruhw aria makri anan yopuyopuni.

Aria apak ta munek tenkyuman ihih nyumneh.

Aria debeinyi nyeigur nyuni yopipi urkwip

puni saki iri dodog ta shupe abom um anan atun ihih nyumneh. Adur atin!”

Arudok Eriger Douk Eshudok Arpesh Shemnegor Iri Douk Ratu

¹³ Aria anan um amudok 24-poreim debeimi narige nakri, “Eshudok arpesh shor rouhi shigorihiwihi rupeh iri douk meishi? Eshesh shanaki meigunum iri?”

14 Aria eik yakripan yakri, “Debeini, nyak kanak douk nyadukemesh, eik uwok.” Aria anan nakripe nakri, “Eshudok arpesh seiwok shape agundok atap aria eshudok douk shakanuk agabus Iruhin iri shenekesh shemnek debeiri eriger. Aria eshesh shakwrup esheshih rupeh Nugaen Sipsip enyenyibor owishibor aria hatogur shigorihwih. 15 Douk namudok aria eshesh douk sheyotu hurukatin um Iruhin ananin yopunyi wagitur. Aria nyumneh weibus eshesh shape shenek ananin mour numun ananit debeiti urupat. Aria anudok douk nape enyudok wagitur iri ta nini eshesh nupe aria nutaurumesh. 16 Aria nyurub ta mare wata besh atin aria abar shopunek ta mare besh atin, uwok. Aria debeihi wah shopunek ta mare wata hutao hesh shumnek debeiri eriger, uwok. 17 Um maresh? Nugaen Sipsip douk nyeyotu orokohun hurukatin um debeinyi wagitur iri ta nyupe nyutaurumesh wosik kabi anudok nataurum sipsip wosik iri um. Aria enyen ta nyuraesh shunak shuwok abrudok abar douk ta shubaroh aria bunekesh shupe wosik abom ihih nyumneh iri. Ababar douk bakih atap meyoh bor iri. Aria Iruhin ta nubatikumesh ihihmorim abih aria eshesh ta mare wata shureh atin, uwok.”

8

Nugaen Sipsip Nyabahigeshuk Namba 7 Kendelis Gris Soweshik Buk Iri

1 Douk Nugaen Sipsip nyabahigeshuk namba 7 kendelis gris douk soweshik okwudok buk shadareshok iri gani iruhw heven. Aria madae

enesh eshudok shiyagwreh o shubirak uwe, uwok. Ihishmorim eshudok shape mukareg banab nyutob hurukatin um tukwanin aua. ² Aria yatigu eshudok 7-poreish enselahos douk sheyotowi hurukatin um Iruhin iri sharao 7-poreiruh aruruh.

³ Aria kupainyi ensel nyasuhw anas dis douk shenekas gol iri um shure paura douk shashainyeh nyenek nyugus seisik wosik iri um. Enyen nyasuhw asudok dis aria nyanaki nyey-otu hurukatin um alta douk showem eshudok shenek ofamesh shako Iruhin iri um. Aria sheken sabainyi paura um nyinyanuh um ihishmorim Iruhin ananish arpeshe esheshin beten douk shape shenekan iri. Aria nyeshem enyudok alta douk sheneken iri nyatao hurukatin um debeinyi wagitur iri aria nyenek ofamesh um Iruhin. ⁴ Aria nyih hanu enyudok paura douk enyudok ensel nyasuwen enyenyis wis iri aria nyugus sani Iruhin ananish arpeshe esheshin beten shakitak shato um agundok Iruhin napeum. ⁵ Aria enyudok ensel nyasuhw asudok dis enyudok paura nyor um aria nyanak hurukatin um enyudok alta aria nyonik nyih nyehur dis shukunis aria nyawasheh hagruki agundok atap. Douk enyen nyawasheh hagruki aria utag brerayarog gatrugun abom aria geyagwreh debeg aria debeikwi enyik kwatuk.

Nubatish Enselahos Shahapurish Aruruh

⁶ Aria eshudok 7-poreish enselahos shasuhw 7-poreiruh aruruh iri shenek redi um shahapururuh. ⁷ Aria nyarik iri ensel nyahapurish

enyenyihw oruhw aria shigorihwisi ais douk dodogowis kabi utabor-umori sani nyih douk shenek um owishibor iri shagruki agundok atap. Aria shasiya agundok atap nani rowos um biwotuk outumeb. Aria ehudok nyih hanu onok outuk aria hanu ihigos-morim rowos iri wishap heyateshuk. Aria bio outumeb wapeik, nyih madae hunu uwe.

⁸ Aria nyagiguk iri ensel nyahapurish enyenyihw oruhw aria shawashak enen enyudok kabi douk onohw debeihwi nyih hanuhw iri yoduhw hwagrukuk youg. Aria shasiyauk youg um biwotuk outumeb aria onok outuk youg gwanenem um owishibor. ⁹ Aria shasiya ihishmorim eshudok eneshenesh shape youg iri um bibatun lainab aria anan lain shagok shatuh. Aria shopunek, shasiya ihiyumorim kruruhiyor douk wor youg iri um bibatun lainab aria anan lain yoweu abom gririgaro watuh.

¹⁰ Aria binyatin iri ensel nyahapurish enyenyihw oruhw aria onok takweikwi unuk douk hanuk nyih jorarehok kabi hanu arkirub um aria kwakutukuk iruhw aria kwanatuk kwagruki agundok atap. Aria shadareh ihibusmorim worubus um bibatun lainab aria okwudok unuk kwagrukuk kwabo anan lain um worubus sani ihibarmorim abar douk bakih atap meyoh iri.

¹¹ Aria anan lain senenem um nubutibari abar. Aria sabaishi arpesh shawok abrudok abar aria baesh shagok shatuh. Nyeigurik um okwudok unuk douk Nubutini Marasin.

¹² Aria nubatin iri ensel nyahapurish enyenyihw oruhw aria shasiya nyumnahin nani wabin

aub bani ihiyumorim unib um biwotuk out-
 umeb. Aria eshesh shanunu onok outuk um
 anudok nyumnahin aun nani onok outuk um
 wabin aun aria onok outuk um oudok unib aria
 shatogur arukwutigunish. Aria shatupak nyum-
 nah um bibatin nyutob aria wab um bibatin.
 Douk namudok aria nyumnah biyab nyutob
 batrugun um aria anob nyutob arukwutigun.
 Aria wab shopunek namudok atin, biyab nyutob
 wanyukeh aria anob nyutob arukwutigun.

¹³ Aria yatrugunugu aria yatigu anar debeiri
 armir kabi douk kumun um rehuru ranak iruhw.
 Aria yemnek um arar reyagwreh debeg rakri,
 “Gihaumesh arpesh shape agundok atap iri.
 Um maresh? Hurukatin um eshudok bishatin
 enselahos ta shihapurish esheshiruh aruruh aria
 enenyenen amaen ta nyutogur um eshudok
 atapishi arpesh aria ta nyunekesh shunamnek
 debeiri eriger.”

9

Anas Wisin Ensel Nyahapurish Enyenyihw Oruhw

¹ Douk anas wisin ensel nyahapurish enyeny-
 ihw oruhw aria yatik onok unuk kwanatuki
 kwakutukuk iruhw kwagruki jurug agundok
 atap. Okwudok unuk douk shakok enyudok ki
 um agudok nuwag douk gagor gabuhuk gani
 atap aria atapig um madae gubuh giyotu an-
 abik iri uwe. ² Aria abudok nyutob enyen
 nyejik agudok nuwag obi nyutob, sabaigwusi
 nyugwus sakih sato abom kabi douk debeihi
 nyih hanu um. Aria agwusudok nyugwus sato

aria sakih seyawiyamuk nyumnahin aun aria
aun nani iruhw shopunek arukwutigun abom.

³ Aria sabaishi eshudok kabi douk debeishi
gormish um iri shakutukuk ogwusudok nyugwus
shagruki agundok atap. Eshesh douk sharao
dodog aria wanohwish kabi douk pupiyak um.

⁴ Aria Iruhin nakripesh um eshesh mare shubo
wishap puni eneshenesh douk shatogur agundok
atap aria shuni rowos shugok, uwok. Eshesh
ta shubo eshudok arpesh douk madae shurao
Iruhin ananin kak nyupe esheshis domaesh iri
uwe atish shunekesh shumnek debeiri eriger.

⁵ Aria eshudok kabi douk gormish shape
shanatuk eshudok arpesh um anas wisib aub.
Aria eshesh shape shemnek debeiri eriger kabi
douk pupiyagwihiyar wanatukesh shemnek um.
Aria eshesh madae shurao dodog um shubo
eshudok arpesh shugok uwe, uwok. ⁶ Aria
abudok nyutob eshesh ta shurim yeh um shugok
um. Aria shopunek, eshesh ta shukri abom um
shugok um atin aria ta uwok. Gok ta nyuruwok-
umeshuk.

⁷ Aria yatik eshudok gormish shape kabi douk
hwosahos um shape shenek redi um shunak um
wanohw. Esheshigos baragos douk enesh eshu-
dok kabi douk yopugwi hatog shenekog gol iri
gwatem um aria esheshigos yamagos sape kabi
arpeshigos um. ⁸ Aria esheshigos baragos sape
kabi armago-wigos um. Aria esheshiruh naruh
hape kabi enen debeinyi wanohwinyi mahin
nyeigurin um laion iri enenyiruh hapeum.
⁹ Aria mishish um, eshesh shor onog siotog douk
dodogowig kabi douk ainab um. Aria esheshish

kapraigiyohos shenekoh iri mah douk kabi hwsahos shanuk sabaishi wilkarahos shahur shanak um wanohw iri shenekoh iri mah. ¹⁰ Aria esheshis honus sape kabi douk pupiyagwihiyar um aria sanatuk arpesh. Aria esheshin dodog douk nyape asudok honus um sunatuk eshudok arpesh um abudok anas wisib aub. ¹¹ Aria eshesh douk enyudok ensel, douk nyasuhw merik um agudok nuwag douk gagor gabuh gani atap iri nyape debeinyi king um eshesh nyasuhw merikwumesh. Enyudok ensel enyenyin nyeigur douk shahwaren eshesh Hibru esheshin baraan um douk shakri, "Abadon." Aria eshesh Grik esheshin shakri, "Apollyon." Aria apak ta mukri "Anudok arman douk nape nanunu ihish enesh-enesh iri."

¹² Eneshenesh sagomatinyish eshudok douk shenek arpesh shemnek debeiri eriger iri douk shatogur shanak shatuh douk. Aria pumnek, biyesh yoweishi abom kabi douk enyudok nyarik iri douk wata shape, aria eshesh ta shugiguk shutogur.

Anawipin Ensel Nyahapurish Enyenyihw Oruhw

¹³ Aria anawipin iri ensel nyahapurish enyenyihw oruhw aria eik yemnek anah mah. Enyudok arpen douk nyeyagwrehi gani anagas um nubatin kona um enyudok alta douk sheneken gol iri. Enyudok alta showem eshudok shenek ofa shako Iruhin um, enyen douk nyatao hurukatin um Iruhin napeum. ¹⁴ Aria enyudok nyeyagwrehi iri nyakrip enyudok anawipin ensel nyasuhw oruhw iri nyakri, "Nyak nyukweshih eshu-

dok nubatish enselahos douk shonoweshik shape abudok debeibi worub nyeiguribum Yufretis iri shunak wosik!”

¹⁵ Aria enyen nyakweshih-esh aria eshesh shasiya ihishmorim arpesih shape agundok atap iri um bisatup awiros. Aria eshesh shabo anap awirop um eshudok arpesih shagok. Eshudok enselahos eshesh douk Iruhin nenekesh shenek garibog abom shapeum abudok atub nyutob, ahudok atuh nyumnah, anudok atun aun aria enyudok atin kwar um eshesh shunek enyudok mour. ¹⁶ Aria eik yemnek shadareh amudok soldia douk hatem hwosahos aria hanak henek wanohw iri um douk sabaimi abom hatogur 200 milion.

¹⁷ Aria eik kabi douk yabo yomnis um aria yatik amudok soldia hatem hwosahos iri hore siotog douk shenekog ainab iri um amamish mishish. Agwudok siotog onog douk owishiborig kabi douk nyih hanu um. Aria onog behrabig, aria onog akitohig kabi douk amudok utom nyeigurim um salfa iri. Aria hwosahos esheshigos baragos sape kabi enesh debeishi wanohwishi mahish nyeigurish um laion iri esheshigos um. Aria nyugwus sani nyih douk hanuwi amudok akitohimi utom nyeigurim um salfa iri shatograri eshudok hwosahos esheshig nokwatog. ¹⁸ Aria eshesh shasiya ihishmorim arpesih um bisatin awiros aria eshesh shabo anap awiropish arpesih shagok. Eshesh douk eshudok bishatin yoweishi abom eshudok, nyih, nyugwus aria ehudok juwehosihi nyih douk hanuwi amudok utom salfa iri douk shatograri hwosahos

esheshig nokwatog iri shaesh shagok. ¹⁹ Eshudok hwosahos esheshin dodog douk nyape esheshig nokwatog gwani honus. Esheshis honus douk sape kabi yuguhw um, aria baragos sapenyesh. Aria eshesh shakwu esheshis honus um shabo arpesh shenekesh sharao debeiri eriger.

²⁰ Aria ihishmorim shapeik iri arpesh douk madae shugok abudok nyutob eshudok yoweishi shatogrumesh abom um obi nyutob, eshesh madae shukutukuk yoweishi inahos uwe, uwok. Eshesh madae shukehuk agabus ehudok aih um shape shenek lotu um sagabehos shani amudok madae adurimi god omi um uwe, uwok. Amudok god omi douk eshesh kanak shenekam esheshis wis iri. Eshesh shenekam shakwu gol rani siliwa iri akitohinyi kapa douk shahwaren um bras iri nyani utabor bani rowos iri. Amam douk madae hutrugun o humnek o hurahaen iri uwe.

²¹ Aria shopunek, eshesh madae shukehuk agabus ehudok yoweih aih um shabo kupaishi shakwumesh eshudok eneshenesh aria shaesh shagok um uwe, shani ehudok um shenek ouruh um, shani enyudok um shenek eneyenen um subagwiruh um, nyani enyudok um shape shenek wehrur um, nyani enyudok um shakwuaruh um uwe, uwok. Eshesh madae shukutinyukuk aria shatanam shukon aparuh Iruhin uwe.

10

Ensel Nyakon Buk Jon Nakwoh

¹ Enyudok nyanak nyatuhuk aria eik yatigu enen kupainyi dodogowinyi ensel nyakutukuk

iruhw heven nyabuhi. Orug gweyor-gwarih enyenyihw yegenyihw. Aria enen renbo nyato iruhw aria enyenyir yamuger rakih rananug, ratem iruhw enyenyig barag. Aria enyenyig yamag gatrugun kabi douk wah hatao hatrugunuk um. Aria enyenyigas aiyas sape kabi douk nyih hanu jurareh iri um. ² Aria enyen nyasuhw onok shokukwi buk douk shadareshok iri enyenyis wis. Okwudok buk douk kwanejik kwape aria enyen nyasuhwok. Enyenyig yopugi aiyag nyagur gor youg, aria anag nyeshishuk amnab. ³ Aria enyen nyogao aria nyahwar debeg kabi enen debeinyi wanohwinyi mahin nyeigurinyum laion iri nyahwar um. Enyen nyahwar jurug aria utag pogarog 7-poreih. Aria utag geyagwreh kabi douk arpenyih mah um. ⁴ Douk utag geyagwreh 7-poreih jurug, aria eik yenek redi um yakri iwem enyudok baraan um anap shup. Aria eik yemnek anah mah hanaki iruhw heven. Aria enyudok nyeyagwrehi iri nyakri, “Enyudok baraan douk utag geyagwreh 7-poreih gakriyen iri, nyak mare nyunyem, uwok. Enyudok baraan nyumneken nyupe um nyak atin!” ⁵ Aria enyudok ensel douk yatrin nyeyotu youg gwani amnab iri nyatuk enyenyin yopunyi rogur nyato iruhw. ⁶ Aria enyen nyakri iruhw um anudok douk nape ihih nyumneh iri ananin nyeigur. Anan douk nenek iruhw atap nani ihishmorim eneshenesh eshudok douk shape iruhw atap iri. Aria shopunek, nenek youg gwani eneshenesh shape shakam-igum iri.

Aria enyen nyakri, “Nyutob batuh, aria Iruhin ta mare nukri nusuhwesh nupe, uwok.” ⁷ Aria

enyudok ensel wata shopunek nyakri, “Abudok nyutob douk namba 7 ensel nyahapurish enyenyihw oruhw obi nyutob, eshudok douk seiwok Iruhin nabeshukesh iri ta shunowereh nunekesh shutogur yopugunum. Anan ta nunekesh shutogur yopugunum kabi douk seiwok anan nakripuk amam profet douk henek ananin mour iri um.”

⁸ Aria eik wata yemnek ahudok atuh mah. Aria enyudok arpen douk iganigadae yemneken nyeyagwreh iruhw heven iri wata shopunek nyakripe nyakri, “Nyak nyunak nyutrin okwudok buk douk kwanajik kwor enyudok ensel douk nyeshish youg gwani amnab iri enyenyis wis iri.”

⁹ Aria eik yanak yarigen um nyuke apudok shokwupi shup shadareshap iri. Aria enyen nyakripe nyakri, “Nyak suwap aria nyupoh. Nyupoh pur nokwat um, apap ta ekehip kabi douk araruh um. Aria pubuh pur apahw um ta nyumnek nubut.”

¹⁰ Aria eik yatrinyap aria yapoh. Aria yapoh por nokwat um, eik yemnek ekehip kabi douk araruh um. Aria yapoh pabuh por apahw um, apap wata nubutip.

¹¹ Aria yemnek enen arpen nyakripe nyakri, “Nyak ta nyukripesh enyudok baraan Iruhin nakripen-enyi shopunek. Enyudok baraan douk nyakrium eshudok douk ta kweipon shutogurum sabaishi arpeshe douk shape ihigosmorim nahobigos douk sape agundok atap iri. Eshesh shuni sabaishi sisigiruh yegeshiweruh-ish arpeshe shuni sabaishi sheneyagwreh kupainyi baraan iri, shuni sabaimi king-omi.”

11

Biom Armam Hakripesh Yopinyi Baraen Iri

¹ Aria enyudok ensel nyeke enen rowog douk shape shasuhw wigah um eshudok eneshenesh iri aria nyakripe nyakri, “Nyak kakitak suh wigah um Iruhin ananit urupat^{11:1}tuni alta douk showem um eshudok shenek ofamesh shako Iruhin iri um. Aria shopunek, nyudareh ihishmorim arpesh douk shape shenek lotu numun ananit urupat iri. ² Aria arbudok narub douk bapeik adukehahitam agundok wit um atudok urupat iri nyak mare nyusuhw wigahumat, uwok. Um maresh? Arbudok narub Iruhin nako eshudok arpesh douk madae shudukem Iruhin iri uwe. Aria eshesh ta shushish Iruhin ananibur yopuburi wabur Jerusalem shupeum um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. ³ Aria eik Iruhin ta ishopok eikim biom armam inekam dodogowim atum hunak hukripesh eikin yopinyi baraen. Amam ta hur yoweih rupeh kabi douk yoweigosi begos^{11:3}um. Eik ta ikripam eikin baraen aria amam ta hunak hukripeshen 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.” ⁴ Amudok biom armam amam douk shakri wobuwobren baraen um

11:1 **11:1** Atudok Iruhin ananit urupat douk takri um Iruhin ananish arpesh. **11:3** **11:3** Amudok biom profet hagipesh esheshih aih hore yoweigosi begos sanahwaram um rupeh um huyabigesh um amam hakri uwok abom um eneshenesh yoweishi inahos eshesh shenekesh iri aria hape hereh.

eshudok biyesh rowos nyeiguhwish um oliv iri shani biyesh eshudok douk showem lamhos shetem um douk shakus hurukatin um Debeini douk nasuhw ihibmorim amnab iri. ⁵ Aria ta enesh arpesh shukri shom o shuham um, nyih ta hutograri amamig nokwatog aria hunu amamish horim hiyatesh. Douk namudok aria meishi arpesh shukri shom o shunekam mumam iri, eshesh ta mare shuruwok, uwok. Eshesh shopunek ta ehudok nyih hunish aria shugok shutuh. ⁶ Amudok biom douk harao big aria dodog um hunek eshah mare hurauri abudok nyutob amam hukriפש Iruhin ananin baraen obi nyutob um. Aria shopunek, amam douk dodogowim um hunek ihibarmorim abar douk bakih atap meyoh iri buni bor worubus sani youg iri um bunenek um owishibor. Aria amam douk dodogowim um hunek eneshenesh yoweishi abom eshudok shutogurum ihishmorim arpesh shunekesh shurao debeiri eriger. Aria douk meibi nyutob amam hukri hunekesh namudok um, amam ta hugipesh amamip atip urkwip.

⁷ Douk kweipon amam ta hukriפש Iruhin ananin baraen hiyaten aria enyudok debeinyi wanohwinyi mahin ta nyukutukuk agudok nuwag douk gagor gabuhuk gani atap iri nyutowi. Enyen ta nyutowi aria nyuto iruhw nyuni amudok biom armam shurpak aria enyen ta dodogowin atin nyom hugok. ⁸ Aria amam ta hucusuk abrudok debeiburi wabur ababih debeihi yah douk seiwok shabo amamin Debeini showeshikan shanaur neir rowog kruse nagok aburi. Abrudok wabur ababish biyesh wobresh

nyeiguhw douk Sodom iri Isip. ⁹ Aria bihotih shuknih anah tukwanih nyumneh, sabaishi arpesh shanaki ihismorim awiros douk shape ihigos-morim nahobigos agundok atap iri ta shutrum. Eshesh douk sisigiruh yegeshiweruh-ish douk sheneyagwreh sabainyi kupainyi baraen iri. Aria eshesh ta mare shukri wosik um enesh arpesh shumuhur shunak shurumam, uwok. ¹⁰ Aria shape agundok atap iri arpesh ta shunadudareh um agundok amudok biom hagok um. Eshesh ta shunadudareh aria shupe shukesh yopinyi presen um esheshish atin atin arpesh. Um maresh? Amudok biom wata hapeum, amam apa henek sabaishi arpesh shape agundok atap iri shemnek debeiri eriger. ¹¹ Douk bihotih shuknih anah tukwanih nyumneh hunak hudiguk, aria ta Iruhin ananip yap wata panak pawisham aria amam ta wata hukitak hiyotu. Aria arpesh ta shutrum aria shunogugur abom. ¹² Aria abudok nyutob, amudok biom ta humnek anah mah. Aria enyudok arpen nyiyagwrehi iruhw heven iri ta nyukripam debeg nyukri, "Ipak putowi agundok iruhw!" Aria amamish horim ta shiyotu shupe shutrum meyoh aria amam ta huwish onog orug aria hupe huto um iruhw heven.

¹³ Aria ta abudok atub nyutob abom, takweikwi enyik ta kwutuk aria sabaishi 7,000-poreish arpesh ta shugok. Aria agundok onok outuk abrudok wabur ta buwishuk aria 9-poreiyu outumeb upeik. Aria eshudok douk shupeik iri ta shutik namudok aria eshesh ta shunogugur abom aria ta shupe shutuk Iruhin

douk nape iruhw heven iri ananin nyeigur nyuto iruhw. ¹⁴ Eshudok biyesh yoweishi abom douk shenek arpesh shemnek debeiri eriger iri douk eshudok shatuh. Aria ipak pumnek! Douk ta mare roubi nyutob aria eshudok bishatin yoweishi abom douk ta shunek arpesh shunumnek debeiri eriger iri ta shutogur.

Namba 7 Ensel Nyahapurish Enyenyihw Oruhw

¹⁵ Douk namba 7 ensel nyahapurish enyenyihw oruhw aria enesh arpesh sheyagwrehi debeg iruhw heven iri shakri,

“Amudok douk riguk hape debeimi king um agundok atap iri amamih nyumneh douk hatuh.

Douk abudok nyutob apakin Debeini nani Kraiss, anudok douk Iruhin nagraehan neshopokan nanaki iri douk

hatogur dodogowim atum um hupe king um agundok atap.

Aria Kraiss ta nupe Debeini nupe nusuhw merik um agundok atap ihih nyumneh.”

¹⁶ Aria amudok 24-poreim debeimi douk hetem amamish debeishi wagiturahos hurukatin um Iruhin iri habuh hakus atap aria hape henek lotu um Iruhin. ¹⁷ Aria hakri,

“Debeini dodogowini Iruhin douk seiwok nyape aria douk shopunek nyape!

Apak manadudareh-umen aria menek tenkyumen.

Um maresh? Nyak douk nyarao nyakin debeinyi dodog

aria douk nyananubur nyape king um ihish-
morim arpesh
shani eneshenesh eshudok.

¹⁸ Eshudok douk madae shudukemesh um nyak
iri uwe,
eshesh juwehosish aria agundok nyak juwehosin
um douk natogur.

Aria ahudok nyumnah douk hatogur um shagok
iri
wata shukitaki aria nyak nyusuhw esheshig
kwotog um.

Aria shopunek um nyukom yopishi eshudok
eneshenesh
um amam profet.

Amam huni ihishmorim nyakish arpesh
nyeiguhw shato-umesh iri
shuni nyeiguhw wokeshi douk shanogugur um
nyak aria shenek lotumen iri.

Aria um nyununu eshudok arpesh douk
shape shanunu abudok amnab iri!”

¹⁹ Douk amudok 24-poreim debeimi hakriyuk
namudok jurug aria Iruhin ananit debeiti urupat
tatao iruhw heven iri tanajik. Aria asudok bogis
douk dodogowinyi baroen kontrak Iruhin nakrip
eshesh Israel enyi nyor um sakusi yopugunum
gani numun urupat. Aria utag pogarog geyag-
wreh aria gatrugun abom. Aria eik yemnek anah
debeih mah. Aria enyik kwatuk aria sabaisi
debeisi shigorihwisi ais kabi douk utabor-umori
sagruki atap.

12

Armatok Kwani Debeiri Yur

¹ Aria shatik um enen dodogowinyi abom kak um shutrin aria shudukemesh shukri enen dodogowinyi arpen hurukatin um nyutogur. Enyudok kak nyanakwarum nyatogur nyape iruhw heven. Aria nyatograri iri kak douk enyudok. Onok armatok kwape aria okwok kwashok nyumnahin aun kabi douk rupah um. Aria wabin nape shakameruh um okwokwiruh yeriweruh. Aria kowem anat yoputi hat douk 12-poreiyu unib wapenyat iri kabi douk de-beiwori otu wogwem iri um okwokwig barag.

² Aria okwok douk kwonarahaen aria kwape kwabirak um kwakri kwubunuh aria kwareh kwahwar debeg. ³ Aria wata shopunek, kupainyi dodogowinyi kak nyanakwarum nyatogur nyape iruhw heven. Aria nyatograri douk enyudok. Enen dedebeinyi owishiborinyi mahin kabi douk anar takweiri yur um nyanakwarum nyatogur nyape. Enyen 7-poreigos baragos seiren aria 10-poreiruh shuworuh hakihen barag. Aria 7-poreig yopugwi hatog douk debeimi atum hogwem iri gwatem atug atug um enyenyigos baragos. ⁴ Aria enyen nyakwu enyenyip honup nyogat unib douk wape atugun um onok outuk iri gani iruhw utag aria nyawasho wagrुकुकि atap. Aria bio outumeb um unib wapeik iruhw utag. Aria enyen nyanak nyeyotu apahwik um okwudok armatok douk hurukatin um kubuki batowin iri um nyakri kadak okwok kwun-yubuki atin aria enyen arigas nyunyuhur nyun-yoh. ⁵ Aria okwok kwabanuh kwabuki armanin batowin. Anudok arman kweipon ta nupe dodogowin atun aria ta nusuhw ainim butum

aria nupe debeini um ihishmorim arpesh douk shape ihigos-morim nahobigos iri. Douk okwok kwanabuki aria eshesh shatrukwan sharan shanak um Iruhin um ananin debeinyi yopunyi wagitur douk anan napenyen iri. ⁶ Aria okwok kwaruwok kwanak um anabik wehigunum arpesh uwok um. Okwok kwanak um agundok douk Iruhin nenekagun-umok um kwunak kwupeum. Aria agundok eshesh ta shupe shutaurumok kwupe 1,260-poreih nyumneh. Ehudok 1,260-poreih nyumneh douk shopunek atin um bishatin shuknish aria enen tukwanin kwarahos.

⁷ Aria debeihwi wanohw hwatogur iruhw heven. Enyudok debeini Iruhin ananin ensel douk nyanahwar um Maikel iri nyani enyenyish enselahos shabo arudok debeiri yur. Aria arudok yur shopunek rani ararish yoweishi enselahos wata shatanam shawanam wanohw.

⁸ Douk eshesh sharpak aria yur rani ararish enselahos madae dogogowish uwe. Aria eshesh madae anabik uwe um shupe iruhw heven um.

⁹ Aria Iruhin ananish enselahos shasuhwesh shawashesh shabuhi atap. Arudok yur douk seiwok rape aria douk shopunek rape iri. Arar douk shahwaror um yoweini sagaben o Satan. Anan douk nape nenek rohwi um ihishmorim arpesh douk shape agundok atap iri. Anan nani ananish yoweishi enselahos, eshesh douk showashesh shagruki agundok atap.

¹⁰ Aria eik yemnek anah debeihi mah. Aria enyudok arpen nyeyagwrehi debeihi mah gani iruhw heven iri nyakri,

“Douk agundok um Iruhin narap

matanamori mape wosik um douk nanaki.
 Aria Iruhin neyabigap um anan douk
 dodogowini abom
 aria ta nupe king um apak ihih nyumneh!
 Aria douk Kraiss, Iruhin nagraehan
 aria neshopokan nanakumori nurao arpesih iri
 douk
 neyabigap um anan douk dodogowini
 aria ananin big nyatogur deben.
 Um maresh? Arudok yur douk reyotu rape
 renekumesh rohwin baraen eshesh Kris-
 ten,
 rakrip apakin Iruhin nyumnah wab
 rakri eshesh shenek yoweih aih iri arar douk
 Iruhin ananish enselahos shawashor
 rakutukuk iruhw heven ragruki agundok atap.
¹¹ Aria apakish ashukenyish owashish douk
 shagipesh Kraiss iri
 shenek uhwinyumor.
 Um maresh? Eshesh shape dodogowish um
 enyudok Nugaen Sipsip douk
 seiwok shaen nyagok iri enyenyibor owishibor
 bani enyenyin adurin baraen douk eshesh
 shakripeshen iri.
 Esheship urkwip douk por abom um shakri
 shukripesh enyudok adurin baraen
 aria eshesh madae urkwip purum shukri
 shupe wosik agundok atap um uwe.
 Aria shopunek, eshesh madae shunogugur um
 kupaishi arpesih douk
 shakon agabus Iruhin iri shesh shugok um uwe.
¹² Douk namudok aria ipak pape iruhw heven iri
 puni iruhw utag, ipak ta punadudareh.

Aria ipak pape atap pani youg iri eik yakri giha-
umep,

ipak ta punnek debeiri eriger.

Um maresh? Satan douk nagrukugu um ipak.

Aria anan douk juwehosin abom. Um maresh?

Anan nadukemesh um anan nupe nurahaen obi
nyutob douk banab abom meyoh.”

¹³ Aria douk arudok debeiri yur ratik um
eshesh shawashor ragruki agundok atap um,
aria arar rape rahiyah okwudok armatok douk
kwabanuh kwabuki nunganin iri. ¹⁴ Aria eshesh
shokok biyesh debeishi kumunish kapraigiy-
ohos um kwehuru. Aria okwok kwanadudareh
kwanak gani wehigunum arpesch uwok um. Ok-
wok kwanak agundok um eshesh shupe shutau-
rumok eshudok bishatin shuknish aria enen
tukwanin kwarahos um arudok yur mare rok.

¹⁵ Aria sabaibari abar batograri ararit nokwat
aria batogur banak. Ababar bagipeshok banak
kabi douk worub batogur banak um. Um arar
rakri kadak abrudok abar bunak aria buraok
bunak bok kwugok. ¹⁶ Aria annab bataurumok.
Aria annab puwarob banak tukwotukwan aria
abrudok abar bagrukuk atap. ¹⁷ Aria arar juwe-
hosir abom um okwudok armatok aria ranak
um rakri runi ihishmorim okwokwish batowish
aria barheshish shurpak. Eshesh douk eshu-
dok ihishmorim arpesch douk shagipesh Iruhin
ananin lo aria shakripesh Jisas ananin adurin
atinyi baraen aria shagipeshen iri.

13

¹ Aria arar ranak reyotu anagas um youg.

Biyesh Debeishi Wanarish Mahish

Aria eik yatigu enen debeinyi mahin nyape urah iri nyakutukuk youg nyakitak nyape nya-towi. Enyen 10-poreiruh shuworuh hakihen aria 7-poreigos baragos seiren. Aria 10-poreig yop-ugwi hatog douk debeimi atum hogwem iri gwa-tem otuhw otuhw um arhudok shuworuh. Aria enen yoweinyi nyeigur nyetem enyudok mahin enyenyigos baragos. Baugenyum baraan um enyudok nyeigur douk shabubunim um Iruhin.² Enyudok mahin douk nyape kabi enen debeinyi wanohwinyi mahin douk shahwaren um lepat iri. Aria enyenyigas aiyas sape kabi enen debeinyi wanohwinyi mahin shahwaren um bea iri. Aria enyenyit nokwat kabi douk enyudok debeinyi wanohwinyi mahin douk nyanahwar um laion iri enyenyit um. Aria arudok yur reken ararin dodog aria big nyani ararin debeinyi yopunyi wagitur um enyudok debeinyi mahin.³ Aria anag um enyudok mahin enyenyig barag, takweibi arab bapenyag kabi douk shaen nyagok um. Aria enyen douk madae nyugok uwe, uwok. Abab wata banakawis. Douk namudok aria ihishmorim arpesh shape agundok atap iri shakitak yowiyokuk um enyudok mahin aria shagipeshen.⁴ Aria arudok yur douk reken ararin big um enyudok mahin. Douk namudok aria ihishmorim arpesh shenek lotu um arudok yur. Aria eshesh shenek lotu um enyudok mahin shopunek shakri, "Arpen douk madae enen dodogowin kabi douk enyudok mahin um uwe, uwok. Enyen atin douk dodogowin abom. Aria ta omi dodogowin um nyuni enyen shurpak?"

⁵ Aria Iruhin nakri wosik nape natrin meyoh enyudok mahin um enyen nyupe debeinyi um sabaishi arpesh um 42-poreib aub. Abudok 42-poreib aub douk shopunek atin um bishatin shuknish aria enen tukwanin kwarahos. Aria enyen nyape nyeyagwreh enenyenen yoweinyi abom baraen aria nyape nyatuk enyenyin nyeigur nyato iruhw. ⁶ Aria enyen nyanonubur nyape nyabubunim um Iruhin. Enyen nyabubunim um ananin nyeigur nyani ananibur wabur bani eshudok arpesh douk shape iruhw heven iri. ⁷ Aria Iruhin neken dodog aria enyen nyani Iruhin ananish arpesh sharpak aria enyen nyaesh nyahiyahesh. Aria enyen nyarao debeinyi big um nyupe king um ihishmorim arpesh shape ihigos-morim nahobigos iri. Shuni ihismorim debeisi awirosish, shuni ihishmorim sheneyagwreh ihin kupainyi baraen iri, shuni ihishmorim ihiruh sisigiruh yegeshiweruhish arpesh. ⁸ Aria ihishmorim arpesh douk shape agundok atap iri ta shunek lotu um enyudok mahin. Ihishmorim eshudok arpesh douk seiwok Iruhin madae nunek agundok atap uwe, aria anan madae nuwem um esheshish nyeiguhw shutem okwudok buk douk eshudok arpesh ta shupe wosik ihih nyumneh iri esheshish nyeiguhw shutemokwi. Okwudok buk douk enyudok Nugaen Sipsip douk seiwok shaen nyagok iri enenyik. ⁹ Aria douk ipak arigos sapenyep iri um, ta gamo pumnek enyudok baraen!

¹⁰ Eshudok arpesh douk Iruhin nukri wosik um kupaishi

shusuhwesh shuweshikesh shuraesh um
shunuweshik iri,
eshesh ta shunuweshik.

Aria eshudok douk Iruhin nukri wosik um ku-
paishi

shukwumesh bainatog iri,
eshesh ta shukwumesh bainatog aria shesh
shugok.

Adur atin, enyudok kweipon ta nyutogur.

Namudok aria ipak Iruhin ananish arpesch ta
pusuhw ananin baraen dodog pugipeshen aria
piyotu dodogowip atip abudok nyutob enyudok-
mori amaen nyutogrump um.

¹¹ Aria eik yatigu enen kupainyi debeinyi
wanarin mahin shopunek. Enyen douk nyape
iri gani atap nuwag iri nyakitak nyapa nyatowi.
Enyen bioruh shuworuh kabi douk hatogur nu-
gaen sipsip iri hakih baragenyum. Aria enyen
nyeyagwreh kabi douk yuguhw hweyagwreh
um. ¹² Aria enyen nyakwu enyudok nyarik
iri mahin enyenyin big aria dodog um nyupe
debeinyi um ihishmorim arpesch. Aria shop-
unek um nyupe dodogowin atin aria nyunek
agundok atap nini ihishmorim arpesch shunek
lotu um enyudok nyarik iri mahin douk takweiti
nyubrut tape anag enyenyig barag kabi douk
shaen nyagok iri um. Aria enyen madae nyugok
uwe, uwok. Aria abab banakawis. ¹³ Enyudok
nyagiguk iri mahin nyenek enen mour douk
Iruhin atun neneken iri agundok nabesish
um ihishmorim arpesch. Enyen nyeneken iri
douk enyudok. Enyen nyenek nyih hakutukuk
iruhw heven hagruki agundok atap. ¹⁴ Aria

Iruhin nakri wosik aria enyen nyenek sabainyi Iruhin atun neneken iri mour agundok nabesin um enyudok nyarik iri mahin. Douk enyen nyenekesh namudok aria enyen nyape nyenek rohwa um ihishmorim arpesha shape agundok atap iri. Aria enyen nyape dodogowin atin aria nyakripesha um shunek enyudok nyarik iri mahin enyenyir aborir aria shupe shutuk enyenyin nyeigur nyuto iruhwa. Enyen douk seiwoka shaen shakwumen bainat aria enyen madae nyugoka iri uwe. Enyen wata nyape.

¹⁵ Aria Iruhin nakri wosik aria enyudok nyagiguka iri mahin nyahapurish enyenyip yap pawish enyudok nyarik iri mahin enyenyir aborir douk eshesh shenigor iri aria nyorukar yapis. Enyen nyenekar namudok um riyagwreh aria runek eshudok arpesha douk shakri uwoka um shunek lotumar iri shugoka. ¹⁶ Aria enyen dodogowin atin abom um nyakri ihishmorim arpesha, nyeiguhwa shato-umesh iri, ^{13:16} shuni nyeiguhwa wokeshi, shuni shanagrem sabaishi eshudok eneshenesh iri, shuni yaruhish iri, shuni shape shakamum kupaishi shenekumesh mour meyoh iri, shuni shape wosik iri um shurao enen kak nyupe esheshish domaesh o esheshish yopishi roguhwa.

¹⁷ Enyen nyenekesh namudok um meinyi arpen douk mare nyurao enyudok kak o enyudok namba iri, enyen ta mare nyutor eshudok eneshenesh o nyunek salimesha um kupaishi shutorish, uwoka. Enyudok namba o kak douk nyakri wobuwobren baraen um enyudok mahin enyenyin

13:16 **13:16** Putik futnot nyape Revelesen 11:18 iri.

nyeigur.

¹⁸ Apak ta murao saki um mudukemesh um baugenyum baraen um enyudok namba. Enyudok arpen douk nyudukemesh abom iri enyen ta nyudukemesh um baugenyum baraen um enyudok namba. Um maresh? Enyudok namba douk nyakrium anan arman ananin nyeigur. Aria enyudok namba douk 666.

14

Sabaishi 144,000-poreish Arpesh Sheyarub Onohw Namuhwi Awehw

¹ Aria eik Jon wata yatrugunugu aria yatigu nugaen Sipsip nyeyotu ahwudok yoduhw douk shahwarohw um Saion iri. Enyen nyani sabaishi 144,000 -poreish armam armago douk enyudok Nugaen Sipsip nyani enyenyin Yain amamish nyeiguhw shetem esheshish domaesh iri sheyotu. ² Aria eik yemnek anah mah hanaki iruhw heven kabi douk debeibi worub batogur debeg um. Aria shopunek, ahah kabi douk utag pogarog debeg um. Ahudok mah eik yemnekah iri ahah douk kabi yopuhi mah douk shabirak eshudok kabi gitahas um iri shabirakesh shenekah iri. ³ Aria eshudok sabaishi 144,000-poreish arpesh sheyotu hurukatin um Iruhin ananin debeinyi wagitur nyani amam debeimi hani eshudok nubatish dodogowishi douk mishish shoresh iri shapeum. Aria eshesh sheyarub onohw namuhwi awehw douk eshesh Jisas Krais nagraehesh aria naraesh shakutukuk agundok atap iri atish shadukemohw iri. ⁴ Anam armam

um eshudok arpesch douk henek yopinyi atin iri. Enesh douk armam henek yopishi inahos atin iri. Amam madae hunek yoweihi aih um huni armago shenek wehrur atin uwe, uwok. Amam hape yopumi armam. Aria hagipesh Nugaen Sipsip hanak ihigunum enyen nyanak um. Aria orokohun um eshudok arpesch shape agundok atap iri, Iruhin nator amudok harik iri armam naram hanakum anan nani Nugaen Sipsip kabi douk ofa um. ⁵ Amam madae enen baraen nyupenyam um henek eneh yoweihi aih um uwe. Aria shopunek, amam madae hunek rohwa atin uwe, uwok.

Iruhin Ananish Bishatin Enselahos Sheneyagwreh Shakri Enen Baraen

⁶ Aria eik yatik enen ensel nyehwuru nyanak gani iruhw iri nyasuhw Iruhin ananin yopinyi baraen douk ta nyupe ihih nyumneh iri um nyukrip ihishmorim arpesch shape agundok atap iri. Enyen ta nyukrip ihiruhmorim sisigiruh yegeshiweruhish arpesch, shuni ihishmorim sisigis awirosish arpesch, shuni ihishmorim sheneyagwreh kupainyi baraen iri, shuni ihishmorim arpesch douk shape ihigosmorim nahobigos iri. ⁷ Aria enyen nyahwar debeg nyakri, “Nyutob banaki um Iruhin anudok debeini jas um nunek skelimum ihishmorim arpesch um. Namudok aria ipak punogugur um anan aria putuk ananin nyeigur nyuto iruhw! Ipak punek lotu um Iruhin douk nenek iruhw heven nani agundok atap nani youg gwani ihibarmorim abar douk batogur atap meyoh iri.” ⁸ Aria nyagiguk iri nyehwuru nyanaki aria nyakri, “Abrudok

debeiburi wabur nyeigur nyato iruhw aburi Babilon bananukuk jurug! Adur ababur bananukuk iyoh! Arpesh shape Babilon iri riguk shenek ihishmorim arpesh shape ihigos-morim nahobigos iri shenek wehrur um aria shenek eneheneh yoweih aih. Eshesh shenek ehudok yoweih aih kabi douk eshesh shape Babilon iri shekesh dodogowibari wainibar abar shaboroh shagugak aria shenekeh iri um.”⁹⁻¹⁰ Aria enyudok binyatin iri ensel douk nyagipesh eshudok biyesh sharik iri enselahos iri nyahwar debeg nyakri, “Ihishmorim arpesh douk shenek lotu um enyudok debeinyi mahin nyani enyenyir aborir aria sharao enyenyin kak nyape esheshish domaesh o esheshish roguhw iri ta shuwok anan kupaini wain. Anudok wain douk nakri wobuwobren baraen um agundok Iruhin anan juwehosin um douk ta nunekesh shumnek debeiri eriger iri. Aria anan ta mare nukri nenek gihaumesh, uwok. Anan ta juwehosin-umesh abom aria nunekesh shumnek debeiri eriger um nuwanamesh eneshenesh yoweishi inahos eshesh shape shenekesh iri. Aria Iruhin ananish enselahos shuni Nugaen Sipsip ta shiyotu shutrish aria eshesh ta debeih nyih hunish. Ehudok nyih douk hanuwi anab akitohibi amnab nyeigurib um salfa iri.¹¹ Aria nyugus douk sakih ehudok nyih douk hanu eshudok arpesh shemnek debeiri eriger iri ta sukih suto ihih nyumneh. Aria eshudok arpesh douk shenek lotu um enyudok debeinyi mahin nyani enyenyir aborir aria sharao enyenyin kak douk nyakrium enyenyin nyeigur iri, nyumneh weibus eshesh ta

mare shupe um shurao uhwin, uwok. Eshesh ta shupe um shumnek debeiri eriger namudok atin.”

¹² Namudok aria Iruhin ananishi arpesh douk shagipesh ananin lo aria shenek bilip dodogowish atish um Jisas iri, eshesh ta shiyotu dodogowish atish abudok nyutob eshesh shumnek debeiri eriger obi nyutob um.

¹³ Aria yemneku anah mah. Aria enyudok arpen nyeyagwrehi iruhw heven iri nyakri, “Nyak wem enyudok baraen anap shup um eshudok douk shasuhwen dodog Debeini ananin baraen shagipeshen iri. Baraen enyudok, ‘Eshudok douk shatukur Debeini aria shugok shunak iri shuni eshudok douk ta kweipon shugok iri, eshesh ta shupe wosik aria ta shunududareh!’ ”

Aria Iruhin ananin Mishin shopunek nyakri, “Adur, eshesh ta shukutukuk ihinyumorim debeinyi mour eshesh shape sheneken iri aria ta wata shupe um shurao uhwin shupe meyoh. Um maresh? Eshesh ta mare shunak meyoh, uwok. Ehudok yopihi aih aria mour eshesh shape sheneken iri ta nyunamesh nyunak. Aria Iruhin ta nukesh enesh yopishi eshudok eneshenesh um ehudok aih aria mour eshesh sheneken iri.”

Shaurimori Worigun Agundok Atap Um

¹⁴ Aria wata shopunek yatrugunugu aria yatik onog shigoriwigwi orug. Aria enen arpen nyetemori ogwudok orug. Enyen nyape kabi “Anudok Arman douk natogur adurinyi arpen iri.” Anan nowem anat yoputi hat shenekat um gol iri douk debeimi atum hogwem iri amamigos baragos. Aria nasuhw anap wanohwip atupi

ponodaresh iri nogwotep ananis wis. ¹⁵ Aria kupainyi ensel nyatograri atudok Iruhin ananit debeiti urupat aria nyahwaran debeg anudok natem ogwudok orug iri nyakri, “Nyak nyukwu nopudok nogwotep nyurimori worigun. Um maresh? Ahudok nyumnah um worigun nunou-rimori um agundok atap um douk hatogur.”

¹⁶ Aria anudok arman natem ogwudok orug iri nawashak ananip nogwotep pabuhi agundok atap aria nabre ihigunmorim worigun.

¹⁷ Aria kupainyi ensel nyatograri atudok Iruhin ananit debeiti urupat gani iruhw heven. Aria enyen shopunek nyasuhw anap wanohwip atupi ponodaresh iri nogwotep. ¹⁸ Aria enen kupainyi ensel shopunek douk nyape nyasuhw merik um nyih iri nyatograri gani enyudok alta douk showem eshudok shako Iruhin iri um nyakus um. Aria enyen nyahwaren debeg enyudok douk nyasuhw wanohwipi nogwotep iri nyakri, “Nyak nyukwu nyakip nogwotep nyubre epudok wainip shuruwep douk peir anaruh madururuh douk hanahwar um wain iri um agundok atap. Um maresh? Epep douk buwarep!” ¹⁹ Aria enyudok ensel nyawashak enyenyip nogwotep pabuhi um agundok atap aria nyabre epudok ihipmorim shuruwep. Aria nyepuhur nyanak nyowashep pabuhuk anag de-beigi tenk douk shenekag utabor iri um shumak-wiyeshep aria shunek wainibar abar. Enyudok wobuwobren baraen douk nyakrium agundok Iruhin anan juwehosin um eshudok arpeshep douk shape shenek yoweihhi aih iri. ²⁰ Aria anudok wain eshesh shanak shamakwiyeshan

agudok tenk adukehahibur um abrudok de-beiburi wabur. Aria sabaibori owishibor douk batograri adukehahig um agudok tenk iri bawori banak rougun wosik um 300 kilomita. Aria abrudok sabaibori owishibor hurigasarubor bato um douk wosik hurukatin um 2 mita. Enyudok wobuwobren baraan douk nyakrium agundok Iruhin anan juwehosin um eshudok arpesh douk shape shenek yoweih i aih iri.

15

Iruhin Ananish 7-poreish Enselahos Shasuhw Eshudok Douk Shenek Arpesh Shemnek Debeiri Eriger Um

¹ Aria eik wata shopunek yatik kupainyi debeinyi kak nyatogur iruhw heven. Enyen douk nyatogur um nyiyabig arpesh um agundok douk Iruhin dodogowin um nini agundok anan juwehosin um eshudok yoweishi inahos arpesh shenekesh iri um. Aria eik yape yanasorik um enyudok kak. Kak douk enyudok. Eik yatik 7-poreish Iruhin ananish enselahos douk shasuhw 7-poreish shagiguk abom iri eshudok eneshenesh um shunek arpesh shumnek debeiri eriger iri. Eshudok yoweishi eneshenesh, eshesh douk shagiguk abom iri. Um maresh? Abudok nyutob ta shubo eshudok arpesh douk shape agundok atap iri ba iyoh, aria agundok Iruhin anan juwehosin abom um ta nutuh. ² Aria eik yatik enen enyudok douk nyape kabi yougmori um. Enyen nyape kabi wenyir, douk shenegor rani nyih iri. Aria shopunek, eik yatik enesh arpesh sheyotu anagas um youg.

Eshudok arpeshe eshesh douk sheyotu dodogowish shenek uhwinyum wanohw shabo enyudok debeinyi mahin iri. Aria shopunek, eshesh shenek uhwinyum enyenyir aborir rani namba douk nyakri wobuwobren baraen um enyenyin nyeigur iri. Aria eshesh shasuhw eshudok kabi gitahas um douk Iruhin nekeshesh iri. ³ Aria eshesh shape sheyarub ahwudok awehw douk nenek Iruhin ananin mour iri Moses nani Nugaen Sipsip amamihw. Ahwudok awehw douk sheyarub shakri namudok,

“Debeini Iruhin, nyak douk dodogowinyi abom aria nyabo ihishmorim eneshenesh shabuhuk iri.

Nyakh aih douk yopiyopihi abom.

Aria nyakin mour douk dodogowinyi abom aria arpeshe shatrin aria mishish shakitak yowiyokuk!

Nyak nyape King um ihigos-morim nahobigos douk

sape agundok atap iri.

Aria nyak nyenekeh iri aih aria mour douk adurin atin abom!

⁴ Debeini, ta omi mare nyunogugur um nyunek lotumen?

Aria ta omi nyukri uwok um

nyutuk nyakin debeinyi nyeigur nyuto iruhw?

Nyak atin yopunyi abom.

Aria ihishmorim arpeshe shape ihigos-morim nahobigos iri

ta shunaki shunek lotu um nyak atin.

Um maresh? Nyakin ihinyumorim yopinyi mour iri aih douk shatogur yopugunum.”

⁵ Douk enyudok nyanakuk aria yatigu atudok Iruhin ananit debeiti urupat gani iruhw heven tanajik. Aria eik yatigu numunitum atudok selit urupat douk Iruhin napenyot iri. ⁶ Aria Iruhin ananish 7-poreish enselahos douk shasuhw 7-poreish yoweishi eshudok eneshenesh iri shakitak shatograri atudok urupat. Eshudok yoweishi douk ta shunek arpes shumnek debeiri eriger iri. Eshesh shorari yopihi atih hatrugun iri shig-orihiwihi rupeh. Aria shawashak iri letog douk shenekog gol iri um esheshish mishish. ⁷ Aria enen um eshudok nubatish dodogowishi douk mishish shoresh iri nyekesh 7-poreis dis douk shenekas gol iri um eshudok enselahos. Asudok dis douk shishuknis um Iruhin douk nape ihih nyumneh iri um anan juwehosin um. ⁸ Aria atudok Iruhin ananit debeiti urupat shuknit um ogwusudok yopugwusi nyugwus douk satograri agundok douk Iruhin dodogowin aria natrugun abom um. Aria abudok nyutob, madae enen arpen ta dodogowin um nyunak nyuwish um uwe, uwok. Enyen ta nyupe arigaha eshudok 7-poreish enselahos shiyatak enyudok mour um eshudok 7-poreish yoweishi douk shenek arpes shemnek debeiri eriger iri ba iyoh, aria enyen wosik ta kadak nyunak nyuwish.

16

7-poreis Dis Douk Shukunis Um Eshudok Douk Iruhin Juwehosin-umesh Abom Um

¹ Aria eik yemnek anah mah. Aria enen arpen nyeyagwrehi atudok Iruhin ananit debeiti

urupat. Aria enyudok nyeyagwrehi iri nyakrip eshudok 7-poreish enselahos debeg nyakri, "Ipak punak purak Iruhin anan juwehosin um nyor ipakis dis iri nyubuhukuk atap!"

² Aria nyarik iri ensel nyanak nyourak eshudok shor enyenyis dis iri shabuhukuk atap. Aria takwetakweibi yoweibi ereb batogur um enesh arpesh. Ebeb douk batogur um ihishmorim douk sharao enyudok debeinyi mahin enyenyin kak nyape esheshish roguhwan shani domaesh aria shenek lotu um enyenyir aborir iri.

³ Aria nyagiguk iri ensel nyaurak eshudok shor enyenyis dis iri shabuhukuk youg aria youg gwatanam gwanenem um owishibor kabi douk shagok iri arpesh esheshibor um. Aria ihishmorim eshudok shape youg iri shagok.

⁴ Aria binyatin iri ensel nyaurak eshudok shor enyenyis dis iri shabuhukuk worubus aria ihibarmorim abar douk batogur atap meyoh iri batanam banenem um owishibor atubor.

⁵ Aria eik yemnek enyudok ensel douk nyasuhw merik um ihibarmorim abar iri nyakri,
"Nyak adurinyi. Seiwok baugos abom um nyak nyape,

aria douk shopunek nyape.

Baraen nyak nyeneken um eshudok arpesh douk shenek yoweishi inahos iri douk yopin abom.

Eshesh shemnek debeiri eriger wosik um yoweishi inahos eshesh shenekesh iri.

⁶ Um maresh? Eshesh shabo nyakish arpesh shani امام profet

douk Iruhin nakripam baraen hakrip arpesh iri shagok

aria esheshibor owishibor batourak.

Aria ahudok nyumnah douk nyak nyuwanam-
umesh

eshudok shenek yoweishi inahos iri shaboroh.

Abrudok owishibor douk bakri wobuwobren
baraen um

arudok debeiri eriger douk Iruhin nenekesh
shemnegor iri.

Aria arar douk renekesh-umesh wosik um

eshudok yoweishi inahos eshesh shape
shenekesh iri.”

⁷ Aria eik yemneku enen arpen nyeyagwrehi
enyudok alta douk shape showem eshudok
shenek ofamesh shako Iruhin iri nyataoum. Aria
enyudok arpen nyeyagwrehi iri nyakri,

“Debeini, nyak douk Dodogowini abom Iruhin.

Nyak nyeneken um arpesk iri baraen douk yopin
abom!”

⁸ Aria enyudok nubatin iri ensel nyaurak
eshudok shor enyenyis dis iri um nyumnahin
aun. Aria Iruhin nakri wosik aria wah hatao
juwehosih atuh habo arpesk aria nyih hanish.

⁹ Aria ahudok wah hatao juwehosih atuh abom
aria habo enesh arpesk aria shanomnek abom
um debeihi nyih hanishuk. Aria eshesh shape
shahao Iruhin shabubuniman anan douk na-
suhw merik um eshudok yoweishi douk shenek
arpesk shemnek debeiri eriger iri. Aria eshesh
shakri uwok abom um shatanam shukon aparuh
Iruhin aria shutuk ananin nyeigur nyuto iruhw
um.

¹⁰ Aria enyudok anas wisin iri ensel
nyaurak eshudok shor enyenyis dis iri shanak

um enyudok debeinyi mahin nyapenyen iri wag-itur nyakus um. Aria wab babuh beyawiyamuk agundok ihishmorim arpesih douk enyen nyasuhw merikw-umesh iri shapeum. Eshesh shapeum arukwutigun abom. Aria eshesh shem-nek debeiri eriger aria sabaibi ereb bapenyesh aria shape shanatuk esheship yehep. ¹¹ Aria shape shabubunim Iruhin douk nape iruhw heven iri. Aria eshesh madae shukehuk agabus ehudok yoweih aih eshesh shape shenekeh iri uwe, aria shatanam shukon aparuh Iruhin uwe, uwok.

¹² Aria enyudok anawipin iri ensel nyaurak eshudok shor enyenyis dis iri um abudok debeibi worub nyeiguribum Yufretis iri. Aria abar bogerukuk abom um shugabemam yah amam king-omi douk ta hunaki gani aun nakihumori.

¹³ Aria eik yatigu bishatin shanabosusih iri yoweishi sagabehos douk shape kabi makihos um. Eshesh shatograri arudok debeiri yur rani enyudok debeinyi mahin shani anudok nenek rohwmesh iri profet esheshig nokwatog.

¹⁴ Eshesh douk bishatin eshudok yoweishi abom sagabehos douk shape shenek enyenenen mour kabi douk Iruhin atun nape neneken iri. Aria eshudok bishatin iri yoweishi sagabehos ta shunak shurauri ihm-morim king douk hape ihigunum um agundok atap iri um hunaki hupe atugun aria huni dodogowini Iruhin douk nasuhw ihinyumorim dodog iri hurpak ahudok ananih debeih nyumnah.

¹⁵ Aria Jisas Krai nakri, "Ipak mnek, eik ta wata inaku itogrump kabi douk nakwuaruh

iri nanakumogu. Douk namudok aria eshudok arpesih douk mare shishuh aria shugabe shunabuk esheshih rupeh wosik iri, eshesh ta shunadudareh shupe wosik. Um maresh? Eshesh ta mare shugar shupe shurahaen shunak yopugunum aria abraen nyesh, uwok!”

¹⁶ Aria eshudok yoweishi sagabehos sharauri amudok debeimi king hanaki hape agundok douk baraen Hibru shahwaragun um Amagedon iri.

¹⁷ Aria namba 7 ensel nyaurak eshudok shor enyenyis dis iri shanak um utag. Aria eik yemnek anah mah. Enyudok arpen nyeyagwrehi numun Iruhin ananit debeiti urupat douk Iruhin ananin yopunyi wagitur nyakus um. Aria enyudok arpen nyeyagwrehi iri nyahwar debeg nyakri, “Douk eshudok shatuh!” ¹⁸ Aria utag pogarog geyagwreh debeg aria gatrugun abom. Aria debeikwi enyik kwatuk. Douk seiwok agundok atap arpesih shape shanaki arigaha douk aria madae onok okudokmori debeikwi enyik kwutuk uwe! ¹⁹ Aria abrudok debeiburi wabur banasiya um bihatuh-igunum. Aria ihirubmorim debeirubi warub bape ihigos-morim nahobigos agundok atap iri bananukuk. Aria Iruhin urkum morum eshesh shape abrudok debeiburi wabur Babilon iri aria nekesh anudok wain douk shakri wobuwobren baraen um anan juwehosin abom um aria shanoh. ²⁰ Aria ihishmorim unaihos shani ihiruhmorim yodururuh burukwaweshukuk aria shanak shawishuk abom. ²¹ Aria shig-orihiwisi ais kabi douk utabor um sagruki iruhw utag kabi douk eshah harari um aria sabuhi

saesh. Abrudok aisibor utabor douk amaenyibor abom. Ababor atum atum douk 50 kilogram. Aria douk enyudok yoweinyi abom um abrudok aisibor utabor babuhi baesh shemnek debeiri eriger um nyenekesh aria shape shabubunim um Iruhin. Um maresh? Enyen douk yoweinyi abom.

17

Debeikwi Armatok Douk Kwani Kupaimi Shenek Wehrur Iri Kwomnek Debeiri Eriger

¹ Aria enen um eshudok 7-poreish enselahos douk shasuhw asudok 7-poreis dis douk shuknis um Iruhin anan juwehosin-umesh abom um nyanakumori eik aria nyakripe nyakri, “Nyak yowi aria iyabigen um agundok ta okwudok debeikwi armatok douk kwani kupaimi shenek wehrur iri kwumnek debeiri eriger um okwokwih yoweih aih um. Okwok douk kwape hurukatin um sabaibusi debeibusi worubus. ² Aria king omi^{17:2}douk hape agundok atap iri hani okwok shenek wehrur um. Aria sabaishi arpesh shape agundok atap iri shawok okwokwin wain aria shagagak. Anudok wain douk shakri wobuwobren baraan um okwokwih yoweih aih.”

³ Aria Iruhin ananin mishin nyatogrume dodogowin atin. Aria enyudok ensel nyarae nyanak anagun wehigunum arpesh uwok um. Aria agundok eik yatik onok armatok kwatem

17:2 **17:2** Enyudok baraan um king-omi hani okwudok armatok shenek yowesh inahos um douk nyakrium agundok arpesh shakutukuk Iruhin shanak shenek lotu um madae adurimi god omi um uwe.

iruhw um enen debeinyi owishiborinyi wananarin mahin. Enyudok mahin 7-poreigos baragos seiren aria 10-poreiruh shuworuh hakihen. Aria sabaishi nyeiguhw shatem ihihwmorim enyenyihw yegenyihw. Eshudok nyeiguhw douk shabubunim um Iruhin. ⁴ Aria okwudok armatok kwenek biyeh yomogih owishiborihi rupeh. Okwok kwanaginohw okwokwihw yegenyihw um sabaibi yamayamagib batrugun iri weiyoub douk shenekab gol iri. Aria shopunek, anab douk shenekab anabor yopubori utabor bani anab weiyoub douk shatorub debeibori utabor iri. Aria kwasuhw anap kap shenekap gol iri okwokwis wis. Aria eneheneh yoweih aih douk Iruhin nakri wokumeh abom iri hani eneheneh yoweih aih um shani okwudok armatok shenek wehrur um hor apudok kap shuknip. ⁵ Aria okwokwin domaen enen nyeigur nyetem. Baugenyum baraen um enyudok nyeigur douk nyanabeshuk. Enyudok baraen douk nyakri namudok,

“Nyeigur nyuto-umaburi wabur Babilon baugos abom um ihiyumorim armago douk wape wani kupaimi shenek wehrur um wani ihihmorim yoweih abraenyih aih douk agundok atapishi arpesh shape shenekeh iri.”

⁶ Aria eik yatik okwudok armatok kwape kwabo sabaishi Iruhin ananish arpesh douk shenek bilip dodogowish atish um Jisas aria shakripesh ananin baraen kupaishi iri. Okwok kwaesh shagok aria kwogugak abom kabi douk kwawok esheshibor sabaibori owishibor aria kwogugak um. Aria douk yatiguk namudok aria eik

mishin nyakitak yowiyokuk. ⁷ Aria enyudok ensel nyarige nyakri, “Nyak mishin nyakitak yowiyokuk um maresh? Eik ta ikripen um baugenyum baraen um enyudok nyanabeshuk iri baraen um okwudok armatok kwuni enyudok debeinyi wanarin mahin douk okwok kwatemen kurahenyen iri. Enyen douk 7-poreigos baragos seiren aria 10-poreiruh shuworuh hakihen iri. ⁸ Enyudok nyatrin iri mahin douk seiwok nyape aria douk madae nyugok. Aria enyen ta nyukutukuk agudok nuwag douk gagor gabuhuk gani atap abom iri nyuto iruhw aria ta nyunak nyuwishuk.

Aria onok buk kwakus. Okwok douk eshudok arpeshe douk ta shupe wosik atin ihih nyumneh iri esheshish nyeiguhw shetemokwi. Aria enesh arpeshe douk seiwok Iruhin wata nunek agundok atap uwe, aria madae nuwem esheshish nyeiguhw okwudok buk iri uwe ta shutik enyudok mahin aria ta shukitak yowiyokuk. Um maresh? Seiwok enyen nyape aria douk uwok, enyen nyagok. Aria anah nyumnah enyen ta wata nyukitak nyupe.

⁹ Aria meinyi arpen douk nyadukemesh abom iri enyen wosik ta nyudukemesh um baugenyum baraen um okwudok armatok kwani enyudok debeinyi mahin. Agusudok 7-poreigos baragos sape enyudok mahin iri douk shakri wobuwobren baraen um 7-poreiruh yodururuh douk okwudok armatok kwatemaruh iri. Aria shopunek, agagos douk shakri wobuwobren baraen um 7-poreim king-omi. ¹⁰ Amam 5-poreim douk hagok, aria anan douk wata nape dodogowini

king. Aria anan wata nutogur nupe king uwe. Aria anan ta nutogur aria ta nupe banab meyoh nyutob. ¹¹ Aria enyudok debeinyi mahin douk seiwok nyape aria douk madae enen nyupe iri uwe, enyen douk shakri wobuwobren baraan um anan king douk natogur nape nani amudok anam 7-poreim aria hatogur 8-poreim iri. Aria anan ta wata nunak nuwishuk abom.

¹² Aria aruhudok 10-poreiruh shuworuh nyak nyatruruh iri douk shakri wobuwobren baraan um 10-poreim king-omi douk wata hutogur hupe debeimi iri uwe. Amam ta hurao debeinyi big um hupe king-omi huni enyudok mahin. Aria eshesh ta shupe debeishi banab nyutob, atin aua meyoh. ¹³ Aria amudok 10-poreim king ihm-morim hasuhw atin baraan. Amam hakri hupe dodogowim aria huken amamin debeinyi big nyuni dodog enyudok debeinyi mahin um ihishmorim arpes shumnek enyenyin baraan shugipeshen. ¹⁴ Aria amam king-omi huni enyudok mahin ta shuni Nugaen Sipsip nyuni enyenyish armam armago shurpak. Aria Nugaen Sipsip nyuni enyenyishi douk enyen nyagraeshesh aria nyahwadesh shasuhw enyenyin baraan sheyotu dodogowish atish iri ta shubo amudok king huni enyudok mahin shihyahesh. Um maresh? Enyudok Nugaen Sipsip douk Debeinyi abom um ihm-morim debeimi aria nyape king abom um ihm-morim king. ¹⁵ Aria enyudok ensel wata shopunek nyakripe nyakri, "Abusdok worubus nyak nyatik okwudok yoweikwi armatok kwapenyabus iri douk shakri wobuwobren baraan um sabaishi arpes. Eshudok arpes

douk shape sabaigosi nahobigos iri. Eshesh douk sisigiruh yegeshiweruh aria sheneyagwreh sabainyi kupainyi baraan iri. ¹⁶ Aria aruhudok 10-poreiruh shuworuh nyak nyatruruh iri huni enyudok debeinyi mahin ta juwehosin um okwudok yoweikwi armatok. Aria eshesh ta shok kwugok aria shutruk shuwaruk owokwih rupeh aria okwok ta kwugor kwupe aria kwukus. Aria eshesh ta shupe shutah eibug-ikwum shugwoh aria okwok ta shukuhur shukweh nyih aria hunuk hiyatokuk. ¹⁷ Um maresh? Eshesh douk Iruhin neshuhur um shugipesh ananim atum urkum. Namudok aria anan nakri wosik um amam husuhw atin baraan aria enyudok amamin dodog douk amam haraan um hupe king iri um ta wata huko enyudok mahin. Aria enyen ta nyupe dodogowini king arigaha abudok nyutob Iruhin ananin baraan nyutogur adurin abom obi nyutob butogur. ¹⁸ Aria okwudok armatok nyak nyatrak iri douk shakri wobuwobren baraan um abrudok debeiburi wabur. Ababur douk bape kabi anan debeini nyeigur nyato iruh-uman iri arman douk nape debeini um ihm-morim king hape agundok atap iri um.

18

Debeiburi Wabur Babilon Bananukuk Jurug

¹ Douk enyudok nyanakuk aria eik yatigu kupainyi ensel nyakutukuk iruhw heven nyabuhi. Enyen douk nyarao debeinyi big aria enyenyih rupeh hatrugun abom aria ihigunum agundok atap gor nakusuk. ² Aria enyen nyahwar debeg nyakri,

“Abrudok wabur Babilon nyeigur nyato iruhw
 aburi douk
 bananukuk jurug! Ababur bananukuk!
 Aria douk ababur batogur yoweiburi wabur um
 eshudok ihishmorim sagabehos shuni warehos
 shuni ogwuhudok
 yoweiguhwi hwanabosusih abom iri armiguhw
 hwupeum.

³ Um maresh? Sabaishi arpesh shape ihigos-
 morim nahobigos iri shawok okwokwibar
 wainibar abar.

Abrudok abar douk shakri wobuwobren baroen
 um
 okwokwih yoweih aih um shani okwok shenek
 wehrur um.

Eshesh douk shatik arpesh shape Babilon iri
 esheshih yoweih aih aria shagipeshesh
 shenekeh.

Aria amudok ihim-morim king hape agundok
 atap iri

hani abrudok waburishi arpesh shenek wehrur
 um.

Aria eshudok douk shenek bisnis agundok atap
 iri

sharao debeibori utabor um ehudok yoweih aih
 douk

eshudok shape abrudok wabur iri shape
 shenekeh iri.”

⁴ Aria eik yemnek kupaihi mah gani iruhw
 heven. Aria enyudok nyeyagwrehi iri nyakri,
 “Ipak eikishi arpesh, ipak pukutukuk abrudok
 wabur
 aria putogrukuk um mare puni

abrudok waburishi arpesh punek eshudok
yoweishi inahos eshesh shape shenekesh
iri.

Ipak pukutubur-ukuk um ipak mare punnek
debeiri eriger douk ta eshesh shumnekar
iri.

⁵ Um maresh? Eneshenesh yoweishi inahos
eshesh shape shenekesh iri douk
sabaishi abom shape kabi waripak kwagit
nyubuhas kwoshem um.

Aria eshesh shakus shato gani iruhw heven
aria Iruhin natrish aria anan urkum moromesh.

⁶ Ipak padukemesh eshudok eneshenesh
yoweishi inahos
okwok kwape kwenekesh iri douk sabaishi
abom.

Douk namudok aria ipak ta pushanom-umok
wosik atin

okwokwish yoweishi inahos aria peshopokesh
shutoumok.

Okwok kwabadig nubutibari abar bor kap aria
ipak pabarah.

Douk namudok aria ipak wata pubodig
nubutibari abar

namudok atin aria pukok kwubarah um
kwumnek arudokmori atin debeiri eriger

okwok kwenek ipak pemnekar iri.

Aria pushopokor rutoumok shopunek.

⁷ Okwok douk kwatuk okwokwin nyeigur nyato
iruhw

aria kwenek eneshenesh yoweishi inahos douk
okwok mishin nyakitak um kwunekesh iri.

Aria okwok nyeigur nyato iruhw kworao de-
beinyi amaen wosikumok um eshudok
yoweishi inahos douk

riguk okwok kwape kwenekesh iri.

Aria okwok numun nanagunukuk aria kwakri,
'Eik yape debeikwi kwin!

Eik kabi douk raminen madae nugokuk uwe um.

Aria eik ta mare enen amaen nyutogrume aria
nyuneke ireh.

Adur atin ta uwok!'

⁸ Douk namudok aria atuh nyumnah meyoh
sabaishi yoweishi abom eshudok ta shutogurum
abrudok wabur. Eshudok yoweishi inahos
douk eshudok.

Eneheneh yoweishi arugeh ta hutogrumesh aria
ta shureh debeg.

Aria debeirubi nyurub ta besh aria nyih shop-
unek ta hunish.

Um maresh? Debeini Iruhin apa nenek
skelumesh

aria nawanamesh eneshenesh yoweishi inahos
eshesh shenekesh iri douk dodogowini abom.

⁹ "Aria amudok king hape agundok atap iri
hani okwudok armatok shenek wehrur um aria
shenek sabaishi eneshenesh yoweishi shopunek.
Aria amam ta hutiku nyih hunuk aria nyugus
supe sukih aria amam ta hurepok yowiyokuk.

¹⁰ Amam ta hunogugur abom um arudok debeiri
eriger douk okwok kwemnekor iri aria ta hiyotu
rougun aria hupe hukri,

'O giha-mobur abrudok nyeigur nyato iruhw
maburi wabur Babilon!

Giha-umep ipak arpesih pape abrudok dodogow-
 iburi wabur iri! Douk banab nyutob, atin
 aua meyoh

aria ipak pemnek debeiri eriger jurug um
 eneshenesh yoweishi inahos ipak pape penekesh
 iri! ”

¹¹ “Aria eshudok arpesih douk shape shenek
 bisnis agundok atap iri ta urkwip purum abru-
 dok wabur aria esheshiruh aparuh ta yoweruh
 aria shupe shureh. Um maresh? Ta mare wata
 enesh kupaishi arpesih shutor anah esheshih jah,
 uwok. ¹² Ta mare enesh arpesih shutor ahudok-
 mori jah. Gol iri siliwa, shuni yopubori utabor,
 buni yopubi abom weiyoub douk shatarub de-
 beibori utabor iri. Shuni yopihi abom shigori-
 hwihi rupeh huni eneh biyag yomogih owishi-
 borihi rupeh, huni eneh yopihi abom wogeruhihi
 rupeh. Huni ihigosmorim rowos douk seisik
 yopuri unar wosik iri, suni ihishmorim eshudok
 douk shenekesh enen mahin douk shahwaren
 um elefan iri enyenyiruh naruh iri. Shuni eshu-
 dok douk shenekesh agusudok rowos douk sha-
 toragos debeibori utabor iri, shuni eshudok douk
 shenekesh enen akitohinyi kapa nyeigurinum
 bras iri. Shuni eshudok douk shenekesh ainab
 iri, shuni eshudok yopishi abom douk shenekesh
 anabor yopubori utabor iri. ¹³ Eshudok shuni
 ahudokmori jah shopunek. Enyudok shanyoh iri
 rowog sinamon, nyuni enesh eshudok kabi douk
 yabro um, shuni enesh eshudok douk shesheh
 sheisik wosik iri. Shuni enyudok yopinyi sanda
 douk shahwaren um mer iri, shuni anas gris
 douk shahwaras um frankinsens iri. Eshudok

shuni wain iri arudok sharah iri wel, shuni sabainyi abom plaua, shuni wit douk kabi douk rais um. Shuni bulmakauhos iri sipsip iri hwosahos shuni wilkarahos, shuni arpesh douk wata shape sharahaen iri. Eshudok douk shape shakamum kupaishi shenekumesh mour meyoh iri. Eshudok ihishmorim shuni arpesh^{18:13}ta mare wata shutorish atin, uwok.

¹⁴ “Aria eshudok douk shenek bisnis iri ta shukripok namudok shukri, ‘Eshudok enesh-enesh ihishmorim douk nyak mishin nyakitakumesh um nyuraesh iri douk shanak shawishuk. Aria nyakish yopishi eshudok douk shatorish debeibori utabor iri shani eneshenesh yopishi eshudok douk shatrugun abom iri shopunek douk shanak shawishuk. Aria nyak ta mare wata nyutrish atin!’ ¹⁵ Aria eshudok douk shenek bisnis um shonakam um eneshenesh eshudok aria shatorish sabaibori utabor eshudok arpesh shape abrudok wabur Babilon iri ta shunogugur abom um arudok debeiri eriger douk ta abrudok waburishi arpesh shumnekar iri. Aria eshesh ta shunak shiyotuwu rougun aria ta shupe shurepobur. ¹⁶ Aria ta shukri, ‘O giha mobur atubur abrudok nyeigur nyato iruhw mobur iri wabur!’

Seiwok ababur bananek yopihi abom shigori-hwihi rupeh hani sabaihi owishiborihi rupeh shopunek.

Aria banaginohw gol rani yopubori abom utabor

18:13 18:13 Enesh arpesh shape shakamum kupaishi shenekumesh mour meyoh iri. Kupaishi arpesh apa shatorish utabor kabi douk apak mator enesh eshudok shakus stuaahas iri um.

bani weiyoub douk shatorish debeibori utabor iri!

Eshudok eshesh douk shatrugun abom iri.

¹⁷ Aria wata shopunek banab meyoḥ nyutob, atin aua meyoḥ

aria ihishmorim eneshenesh eshudok douk shatorish debeibori utabor iri wata shanak shawishuk.’”

“Aria sabaimi hasuhw bodaeg kruruhiyor douk wahur youg iri hani sabaishi pasindia douk shator kruruhiyor aria sharahaen shanak kupairubi warub iri, hani amudok henek mour kruruhiyor iri, shani ihishmorim arpesh douk apa shenek esheshin mour youg iri eshesh ihishmorim ta shiyotuwi rougun um abrudok wabur Babilon. ¹⁸ Aria abudok nyutob ta shiyotu shutik wabur nyih hunubur aria nyugwus sukitaḥ suto obi nyutob, eshesh ta shukri, ‘Douk madae anabur wabur bape agundok atap iri bupe kabi abrudok nyeigur nyato iruhw aburi wabur um uwe, uwok meyoḥ!’ ¹⁹ Aria eshesh ta shuhur nyupruk^{18:19}shunuwatom baragos aria ta shupe shureh debeg shukri,

‘O giha-mobur atubur abrudok wabur!

Eshudok ihishmorim arpesh douk shogrem kruruhiyor iri

sharao sabaibori utabor abrudok wabur.

Ipak pakri giha mobur abrudok wabur. Um maresh?

18:19 **18:19** Enyudok baraen um shunuwatom nyupruk barag um douk sheneken um shakri shiyabigesh um esheshiruh aparuh yoweruh abom um agundok abrudok wabur bananukuk um.

Douk banab nyutob, atin aua meyoh abrudok
waburish
ihishmorim eneshenesh yopishi eshudok shanak
shawishuk!

²⁰ Aria ipak enelahos pape iruhw heven iri
puni ipak Iruhin ananish arpesh,
puni ipak aposel douk Iruhin nagraehep um
punak pukripesh ananin baraen iri,
puni ipak profet douk pakripesh
Iruhin nakripep-enyi baraen iri,
ipak ihishmorim ta punadudareh.
Um maresh? Iruhin nenek kwotimabur
aria nawanamobur yoweishi inahos abrudok
wabur
aria bemnek debeiri eriger um agundok
seiwok ababur barik benek ipak pemnek debeiri
eriger um.' "

²¹ Douk enyudok baraen nyanak nyatuhuk aria
eik yatik enen dodogowinyi abom ensel nyohur
onok debeikwi burbuduk^{18:21}nyawashok kwa-
grukuk youg aria nyakri,
"Ta shuwashak abrudok debeiburi wabur Ba-
bilon bugrukuk debeg atin gani atap
kabi eik yawashok okwudok burbuduk kwa-
grukuk um.

Aria arpesh ta mare wata shutrubur atin, uwok.

²² Aria eshudok kabi douk gitahas-umori es-
heshih meh
huni eneshenesh douk shabirakesh shenek yop-
ugi musik iri,

18:21 **18:21** Enyudok baraen douk nyakrium okwudok de-
beikwi burbuduk iri douk nyakrium anam takweimi utom douk
eshesh shape shemakwiyesh urubit wit um shaworishat um.

shuni buwaen iri aruruh esheshih meh
ta mare wata shumnekeh atin abrudok wabur,
uwok!

Aria shopunek, eshudok douk shadukemesh um
shunek enenyenen mour iri ta mare wata shutr-
ish atin.

Aria amudok utom douk arpesh shape shakwum
shaworish urubit wit iri shopunek
ta mare wata shumnekam miyagwreh atin abru-
dok wabur, uwok.

²³ Aria nyih lamhosih ta mare wata shutrish atin.
Aria eshudok arpesh douk shakri shunaraum iri
esheshih meh shopunek ta mare shum-
nekeh atin.

Aria riguk arpesh shape shenek bisnis abrudok
wabur
aria sharao sabaibori utabor
aria shatogur debeishi nyeiguhw abom shato-
umeshi.

Aria douk uwok. Aria eshudok arpesh shape
abrudok wabur iri
shenek anaruh subagwiruh aria shenek roh
um
ihishmorim arpesh douk shape ihigos-morim
nahobigos iri.

²⁴ Aria Iruhin natik um abrudok wabur benek
yoweishi inahos
babo amam profet hani sabaishi Iruhin ananish
arpesh shagok.

Douk namudok aria barae abrudok wabur
banasuwen.

Aria ihishmorim arpesh douk
kupaishi shaesh shagok iri shopunek,
barae douk nyanak um abrudok atubur wabur
banasuwen.”

19

Iruhin Ananish Arpesh Shanadudareh Um Agundok Babilon Bananukuk Um

¹ Douk enyudok nyanakuk aria yemnek enen arpen nyeyagwrehi debeihi mah kabi douk sabaishi arpesh shape sheneyagwreh iruhw heven iri um nyakri,

“Apak mutuk Iruhin ananin nyeigur nyuto iruhw!

Apakin Iruhin anan atun narap matanamori mape wosik.

Aria agundok anan dodogowin natrugun abom um douk

nape abom um anan atun.

² Anan neneken um arpesh iri baraen um nasuhw esheshig durdurig kwotog um douk yopug wosik abom aria adurig atug!

Aria okwudok armatok douk kwani kupaimi shenek wehrur um

kwenek sabaishi arpesh shape agundok atap iri shakutukuk yopihi aih aria shagipesh okwokwih yoweih aih.

Douk namudok aria Iruhin nenek kwotumok nakri okwok yoweikwi.

Aria shopunek, okwok kwabo eshudok arpesh douk

shenek ananin mour iri shagok aria douk anan douk nawanamok enyudok yoweinyi poe.

Okwudok armatok douk shakri wobuwobren baraen um

abrudok wabur Babilon.”

³ Aria sabaishi shape iruhw heven iri shape shahwar debeg shakri,

“Apak mutuk Iruhin ananin nyeigur nyuto iruhw!

Aria ogwusudok nyugwus douk sakih ehudok nyih douk hanu

abrudok debeiburi wabur iri ta sukih suto ihih nyumneh!”

⁴ Aria amudok 24-poreim debeimi armam hani eshudok nubatish dodogowishi douk mishish shoresh iri shabuh shoduk ohrubus aria shenek lotu um Iruhin douk nape ananin debeinyi wagitur iri aria shahwar shakri,

“Adur atin, apak mutuk Iruhin ananin nyeigur nyuto iruhw!”

⁵ Aria eik yemnek anah mah agundok enyudok debeinyi wagitur nyakus um. Aria enyudok arpen nyeyagwrehi iri nyakri,

“Ipak ihishmorim penek Iruhin ananin mour iri puni

ipak nyeiguhw shatoumep iri,19:5

puni nyeiguhw wokepari douk punogugur um Iruhin penek lotuman

aria pusuhw ananin baraan pugipeshen iri putuk ananin nyeigur nyuto iruhw!”

Nugaen Sipsip Ta Nyurao Enyenyik Irohukwik Aria Ta Shunek Debeguni Worigun

⁶ Aria eik yemnek enen arpen nyeyagwrehi debeihi mah kabi douk sabaishi arpesh shape sheyagwrehi um. Ahah douk kabi worub batogur beyagwreh um aria kabi utag pogarog debeg um. Aria eik yemnek hakri,

19:5 [19:5](#) Putik futnot nyape Revelesen [11:18](#) iri.

“Apak mutuk Iruhin ananin nyeigur nyuto iruhw!

Apakin Debeini douk anan atun Dodogowini Iruhin abom.

Anan douk nape debeini um ihishmorim arpesh shani

eneshenesh eshudok!

⁷ Anan douk dodogowini arman abom.

Aria douk apak ta aparuh yopuruh

aria munadudareh-uman aria mutuk ananin nyeigur nyuto iruhw!

Nyumnah douk hanaki um Nugaen Sipsip nyurao enyenyik irohukwik.^{19:7}

Baugenyum baraen um Nugaen Sipsip enyenyik irohukwik douk nyakrium Kraish ananish arpesh.’

Okwok douk kwenek garibog kwape um eshesh biyesh shunaraum um.

⁸ Okwok douk shokok anah yopihi hatrugun abom iri

shigorihiwihi rupah kwohur.”

Ehudok rupeh ihih douk shakri wobuwobren baraen um ehudok yopihi abom aih douk Iruhin

ananish arpesh shape shenekeh iri. ⁹ Aria enyudok ensel nyakripe nyakri, “Nyak wem enyudok baraen. Baraen enyudok.

‘Eshudok arpesh douk Iruhin nahwadesh um shunaki um

agundok debeguni worigun douk shenekagun um

Nugaen Sipsip nyurao okwok iri um, douk eshesh wosik shanadudareh.’ ”

19:7 **19:7** Putik futnot nyape Revelesen 11:18 iri.

Aria enyudok ensel wata shopunek nyakripe nyakri, “Enyudok Iruhin ananin baraan douk adurin abom atin.”

¹⁰ Aria eik yabuh yoduk ohrubus hurukatin um enyenyiruh yeriweruh um yakri inek lotuman. Aria enyen nyakripe nyakri,

“Nyak mare nyunek lotu um eik, uwok.

Nyak nyunek lotu um Iruhin atun.

Eik yani nyak wani eshesh Kristen,

apak ihishmorim douk munek Iruhin ananin mour iri atup.

Ipak douk pasuhw enyudok baraan Jisas nakripepen pagipeshen iri.

Enyen douk enyudok atin baraan nyohur

amam profet amamiruh aparuh

aria hakripesh Iruhin nakripam-enyi baraan.”

Arman Netem Shigorihwinyi Hos Iri Anan Douk Krais

¹¹ Aria ogwudok orug douk gweshiguk iruhw heven iri tukarog gwanak gweyatuk tukwotukwan aria eik yatigu enen shigorihwinyi hos nyeyotu numun heven. Aria anudok arman netem enyudok hos iri douk nanahwar namudok. Anan neyotu dodogowin atun nagipesh ananin baraan wosik aria neyagwreh adurin atinyi baraan iri. Aria douk anan nasuhw arpesig kwotog nenekog wosik atin. Aria anan nenek wanohw um, anan apa nagipesh ananini yopihi abom aih atin.

¹² Ananis nabes sape kabi nyih hanu jurareh iri um. Aria anan nowem um sabaigwi yopugwi hatog douk king-omi atum hogwem iri um ananig barag. Aria shopunek, enen nyeigur nyetem ananinw yegenyihw. Kupaishi mare

shudukem um baugenyum baraen um enyudok nyeigur uwe, uwok. Anan atun nadukemen. ¹³ Aria ahudok rouhi rupah anan nohur iri douk shosegruh owishibor aria owishibor atubor bakrupoh. Aria eshesh shahwaran enyudok nyeigur shakri, "Iruhin Ananin Baraen." ¹⁴ Aria eshudok ami douk shape iruhw heven iri shenek yopihi abom shigorihiwihi rupeh aria shetem esheshish shigorihiwishi hwosahos aria shape shagipeshan. ¹⁵ Aria anat wanohwit bainat tatograri anudok arman ananit nokwat. Aria anan ta nukwu atudok bainat um nubo sabaishi arpesh douk shape sabaigosi nahobigos iri. Aria anan ta nusuhw anam butum douk shenekam ain iri aria nupe debeini um ihishmorim arpesh. Aria anan ta nushish wainip shurkwip agudok debeigari tenk douk shenekag utabor iri. Enyudok douk shakri wobuwobren baraen um agundok Dodogowini abom Iruhin nabo ihishmorim eshudok shabuhuk iri juwehosin abom um. ¹⁶ Aria enen baraen nyetem anudok arman ananin mib nyani ananin rupah. Enyudok baraen douk nyakri namudok,

"Debeini um ihm-morim king aria shopunek
Debeini um ihm-morim debeimi."

¹⁷ Aria eik yatigu enen ensel nyeyotuwu nyumnahin aun aria nyahwarugu debeg ogwuhudok ihiguhw-umorem armiguhw douk hwanadudareh hwanak iruhw iri nyakri, "Ipak ihiguhw-morem punakumori Iruhin nenekagun iri debeguni worigun!" ¹⁸ Ipak punaki puwok amudok king-omi huni amudok douk hape debeimi um amam soldia iri huni amudok dodogowimi ar-

mam amamiruh yegeshiweruh. Aria shopunek, puwok hwosahos shuni amudok douk hetem hwosahos iri, huni ihishmorim arpesh. Eshudok douk shape shakamum kupaishi shenekumesh mour meyoh iri, shuni eshudok douk shape wosik iri, shuni ihishmorim nyeiguhw shato-umesh iri,^{19:18}shuni nyeiguhw wokeshi esheshiruh yegeshiweruh!”

¹⁹ Aria eik yatik um enyudok debeinyi mahin nyani amudok agundok atapim king hani esheshim soldia shanak sheyotu atugun. Eshesh shanak sheyotu um shuni anudok arman douk netem enyudok hos iri nini ananim soldia shurpak. ²⁰ Aria eshesh shasuhw enyudok debeinyi mahin nyani anudok nenek rohwumesh iri profet showeshikesh. Anudok profet douk nenek enenyenen Iruhin atun neneken iri mour agundok enyudok mahin nyape um. Riguk anudok profet douk nenek sabainyi mour kabi Iruhin atun neneken iri um aria nenek roh w um eshudok arpesh douk sharao enyudok mahin enenyin kak aria shenek lotu um enenyir aborir iri. Aria enyudok mahin nyani anudok profet eshesh mishish wata shoresh aria showashesh shagrukuk agudok nuwag douk nyih hanuwi amudok utom douk shahwaram salfa iri hanu um. ²¹ Aria anudok arman douk netem hos iri nabo enyudok mahin nyani anudok profet esheshim soldia hagok hatuh. Anan makwumam atudok bainat douk tatograri ananit nokwat iri. Douk amam hagok aria

19:18 **19:18** Putik futnot nyape Revelesen 11:18 iri.

ihiguhw-umorum armiguhw hwanaki hwape
hwawok amamiruh yegeshiweruh aria ogwoguh
dugaroguh abom wosik atin.

20

Satan Nanaweshik Nape Sabaishi Um 1,000-poreish Kwarahos

¹ Aria wata shopunek yatigu kupainyi ensel nyakutukuk iruhw heven nyabuhi. Enyen nysuhwi anan debeini sen nani ki um agudok nuwag douk gagor gabuhuk gani atap aria atapig um madae gubuh giyotu anabik iri uwe.

² Aria enyudok ensel nyasuwor dodog arudok debeiri yur aria nyoweshikor anudok sen um nyuweshikor rupe um 1,000-poreish kwarahos. Arudok yur douk shahwaror um seiwokiri yur iri. Aria shopunek, arar douk shahwaror um renek rohwa um arpeshe rakri eshesh shenek yoweishi inahos atish iri o Satan. ³ Aria enyudok ensel nyawashak arudok debeiri yur Satan rabuhukuk agudok nuwag douk gagor gabuhuk gani atap iri aria nyawarukuk wit dodog. Enyen nyawarukuk wit um arudok yur mare wata runak runek rohwa um arpeshe douk shape ihigomorum nahobigos iri. Arar ta rupe arigaha 1,000-poreish kwarahos shunak shudiguk aria ensel ta wata nyjikumar wit aria arar ta wata rutogur rupe meyoh rupe runarahaen banab meyoh nyutob.

⁴ Aria eik yatigu enesh debeishi wagiturahos douk king-omi atum hapenyesh iri shakus. Aria enesh arpeshe shatem eshudok wagiturahos.

Eshesh douk Iruhin nekesh debeinyi big um shusuhw arpesh esheshig kwotog. Aria shopunek, yatik sabaishi arpesh douk shasuhw Iruhin ananin baraen dodog shagipeshen iri esheshish mishish. Eshesh douk eshudok shakripesh baraen kupaishi um Jisas, aria horim shatupok esheshigos baragos aria shaesh shagok iri. Eshesh douk madae shurao enyudok debeinyi mahin enyenyin kak nyupe esheshish domaesh aria esheshish roguhwa aria shunek lotu um enyen nyuni enyenyir aborir iri uwe. Eshesh wata mishish shawishesh aria shakitak shani Kraish shape debeishi um eshudok 1,000-poreish kwarahos. ⁵ Aria abudok nyutob eshesh shakitaki um, ahah douk sagomih nyumnah abom um shagok iri shakitaki wonugwegwiruh um. Ihishmorim shagok iri arpesh yapis madae suwishesh abudok nyutob uwe, watak. Eshesh ta eshudok 1,000 -poreish kwarahos shunak shudiguk aria eshesh ta kadak yapis suwishesh aria shukitaki. ⁶ Aria eshudok arpesh douk shukitaki wonugwegwiruh ahudok sagomih nyumnah iri, eshesh ta shunadudareh aria shupe Iruhin ananish yopishi abom arpesh. Aria Iruhin nunek yopishi abom um eshesh. Aria agundok um shugiguk shugok um ta mare dodogowigun um nesh shugok anah shopunek, uwok. Eshesh ta shupe kabi pris douk hape henek ofa um eneshenesh eshudok hako Iruhin nani Kraish iri um. Aria eshesh ta shuni Kraish shupe debeishi shusuhw merik um sabaishi arpesh um eshudok sabaishi 1,000-poreish kwarahos.

Satan Nemnek Debeiri Abom Eriger

⁷ Douk eshudok 1,000-poreish kwarahos shunak shudiguk aria Satan ta wata jurug um shunuweshik um aria ta shjikuman wit agudok nuwag aria nutograri aduk. ⁸ Anan ta nutograri um nunak nupe nunek rohwa um sabaishi arpeshe douk shape ihigosmorim nahobigos douk sape ihigunum agundok atap iri. Eshesh douk shape Gok nani Magok iri. Aria Satan ta nuraesh shunak shupe atugun um shupe shurpak. Eshesh douk sabaishi abom kabi douk sabaiti arukot douk takus anagas um youg iri um. ⁹ Eshesh shanak ihigunum agundok atap aria sheyotu shersharik Iruhin ananish arpeshe shapeum. Eshesh douk shape abrudok wabur douk Iruhin urkum manawasham-abur abom iri. Aria nyih hagruki iruhwa heven aria habuhi hanu eshudok Satan ananish soldia heyatesh. ¹⁰ Aria eshesh shawashak Satan douk nape nenek rohwa mesh iri nagrukuk kupaigi debeigi nuwag douk juwehosih nyih hanuwi amudok utom douk shahwaram um salfa iri hape hanumi um. Enyudok debeinyi mahin nyani anudok nenek rohwa mesh iri profet douk sharik showashesh shabuh shor agudok nuwag. Aria agundok eshesh bishatin ta shupe shunomnek debeiri eriger nyumneh weibus ihih nyumneh.

Debeiti Kwot Tatogur

¹¹ Aria eik yatigu enen debeinyi shigorihwinyi wagitur king-omi atum hapenyen iri nyakus. Aria anan debeini netem enyudok wagitur. Aria agundok atap nani iruhwa heven sharuwokuk

shanak shawishuk. ¹² Aria eik yatik eshudok ihishmorim shagok iri. Eshudok douk nyeiguhw shato-umesh iri^{20:12}shani nyeiguhw wokeshi sheyotu hurukatin um enyudok debeinyi wagitur nyakus um. Aria ono bumbek wanajik. Aria okwudok onok buk douk eshudok arpeshtok douk ta shupe wosik ihih nyumneh iri esheshish nyeiguhw shatemokwi shopunek kwanajik. Aria anudok netem enyudok debeinyi wagitur iri natik eneheneh aih hatem oudok bumbek iri douk eshudok arpeshtok douk shenekeh iri. Aria anan nenekumesh baraen wosik-umesh um ihishmorim eneheneh aih douk eshesh shape shenekeh iri. ¹³ Aria ihishmorim shagok iri douk seiwok shagok youg aria esheshiruh yegeshiweruh horukuk youg iri wata shakutukuk youg shakitak shatowi. Aria ihishmorim shagok iri douk shagok shanak shape agundok shagok iri shanak shapeum iri wata shakitak shatowi. Eshesh shakitaki shape aria anudok netem wagitur iri nenekumesh baraen ihishmorim atin atin wosik-umesh abom um eneheneh aih iri mour eshesh shape shenekeh iri. ¹⁴ Aria gok nyani agundok shagok iri shapeum nanawashak nagrukuk agudok nuwag douk nyih hape hanug iri. Agudok nuwag agag atug douk shakri nyagiguk iri gok ta arpeshtok shubuh aria mare shugok anah shopunek um. ¹⁵ Aria ta enesh arpeshtok esheshish nyeiguhw madae shutem okwudok buk douk eshudok arpeshtok douk ta shupe ihih nyumneh iri esheshish nyeiguhw shetemok iri um, eshesh ta shunawashak shugrukuk agudok nuwag douk

20:12 **20:12** Putik futnot nyape Revelesen 11:18 iri. 'E'

nyih hanug iri.

21

Namuburi Wabur Heven Aria Namubi Amnab

¹ Douk enyudok nyanakuk aria eik yatigu namuburi wabur heven bani namubi amnab shape. Barik iri wabur heven bani barik iri amnab shani youg shanak shawishuk abom aria madae enesh shupe uwe. ² Aria eik yatigu abrudok yopuburi wabur Jerusalem. Ababur douk bape iri agundok Iruhin napeum aria bakutukuk iruhw heven bape babuhi. Abrudok wabur douk shaginohwobur kabi douk onok armatok douk kwanaginohw kwenek yopihi atih rupeh aria kwape um kwuni okwokwin raminen shunaraum iri. ³ Aria eik yemnek anah mah agundok enyudok debeinyi wagitur nyakus um. Aria enyudok arpen nyeyagwrehi iri nyakri debeg, “Ipak pumnek! Douk Iruhin nani arpesh shape atugun! Aria anan ta nini eshesh shupe aria eshesh ta shupe ananish atish arpesh. Aria anan ta nupe esheshin debeini Iruhin. ⁴ Aria anan ta nubatikumesh abih esheshis nabes aria eshesh ta mare wata shugok atin, uwok. Aria esheshiruh aparuh ta mare wata yoweruh aria shumnek anar eriger aria shureh, uwok. Ihinyumorim enenyenen douk seiwok nyape nyatogur um arpesh iri douk nyanak nyawishuk abom.”

⁵ Aria anudok nape enyudok debeinyi wagitur iri nakri, “Ipak pumnek! Douk eik yenek ihishmorim eneshenesh eshudok shape iruhw atap iri shatogur namushi!” Aria anan wata shopunek nakripe nakri, “Nyak nyuwem um

enyudok baraeen douk iganigadae nyemneken iri anap shup. Um maresh? Enyudok baraeen douk adurin abom aria wosik um arpesh shumneken aria shusuhwen dodog shugipeshen.”⁶ Aria anan nakripe shopunek nakri, “Eshudok enesh-enesh douk shatogur shatuh! Seiwok baugos um ihishmorim eneshenesh eshudok watak enesh shutogur shupe uwe aria eik yape. Aria kweipon shopunek ta ipe arigaha hugiguk iri nyumnah hutogur. Aria meinyi arpen abar baen iri, eik ta iken anabar abar nyubroh meyoh. Enyen mare nyutorabar, uwok. Abrudok abar douk bakih atap meyoh iri. Ababar douk ta arpesh shubroh aria shupe wosik abom ihih nyumneh iri.”⁷ Aria meinyi arpen douk nyiyotu dodogowin atin nyunek wanohw nyubo yoweishi inahos shubuhuk iri, enyen ta nyugrem ihishmorim eikish yopishi eshudok eneshenesh. Aria eik ta ipe enyen nyenek lotume iri Iruhin, aria enyen ta nyupe eikin batowin.”⁸ Aria eshudok douk shanogugur aria wata shatanam shenek yoweishi inahos iri, shuni eshudok douk madae shusuhw eikin baraeen dodog shugipeshen iri uwe, shuni eshudok douk shenek eneshenesh yoweishi inahos iri, shuni eshudok douk shabo kupaishi arpesh shagok iri, shuni eshudok douk shenek wehrur um iri, shuni eshudok douk shenek ouruh iri, shuni eshudok douk shenek enenyenen um yoweiruhi subagwiruhi iri, shuni eshudok douk shenek lotu um eshudok douk madae adurimi god omi iri uwe, shuni eshudok douk shenek rohwumesh iri, eshesh ihishmorim ta shunak shupe agudok nuwag douk juwehosihi

nyih hape hanu agari. Agudok nuwag agag douk ta arpesih shubuh aria mare shugok anah shopunek um.”

Namuburi Wabur Jerusalem

⁹ Aria enen ensel um eshudok 7-poreish ense-lahos douk shasuhw shagiguk abom iri 7-poreish yoweishi abom eshudok eneshenesh iri nyanaki aria nyakripe nyakri, “Nyak yowi aria iyabigen nugaen Sipsip enyenyik irohukwik.” ¹⁰ Aria Iruhin ananin Mishin nyatogrume dodogowin atin aria agundok eik kabi douk yabo yomnis um. Aria enyudok ensel nyare wanak wato onohw debeihwi rouhwi yoduhw. Aria enyen nyeyabige abrudok Iruhin ananibur yopuburi wabur Jerusalem. Ababur douk baperi agundok Iruhin napeum aria bakutukuk iruhw heven bape babuhi. ¹¹ Aria agundok douk Iruhin dodogowin abom aria natrugun abom um natrugun numun abrudok wabur. Aria ababur babuhi anabik sik kabi douk anam yopumi utom douk shatorum debeibori utabor iri mabuhi um. Aria shopunek, ababur babuhi kabi douk anam utom jasper mani wenyir shabuhi um. ¹² Aria arbudok narub douk sharukarubi narub um abrudok debeiburi wabur iri douk debeirubi abom aria rourourubi bato gani iruhw. Aria 12-poreish duahas shape arbudok narub. Aria shopunek, 12-poreish enselahos sheyotu sheyoh um eshudok 12-poreish duahas. Aria asudok 12-poreis awirosish arpesih douk shakitaki Israel iri esheshish nyeiguhw shetem eshudok 12-poreish duahas. ¹³ Aria bishatin duahas shape gani wobrehah-irub um narub douk bape batik aun

nakihumori um. Aria bishatin shape shatik saut, bishatin shape shatik not, aria bishatin shape shatik aun nabuh um. ¹⁴ Abrudok debeiburi waburirub narub agundok atapirub um douk betem um 12-poreibor utabor um busuwobur batao dodog iri. Aria enyudok Nugaen Sipsip enyenyim 12-poreim aposel douk riguk enyen nyograeham um hunak hukriפש Iruhin ananin baraen iri amamish nyeiguhw shatem abrudok 12-poreibor utabor.

¹⁵ Aria enyudok ensel douk nyani eik weyagwreh iri nyasuhw anam butum douk shenekam gol iri um shape shasuhw wigah um eshudok eneshenesh-am iri. Enyen nyakri nyusuhw wigah um abrudok debeiburi wabur buni arbudok debeirubi narub buni eshudok duahas douk shape narub iri. ¹⁶ Abrudok debeiburi wabur roubur um bani agundok debebur um douk arag atin abom. Aria enyudok ensel nyakwu enyenyim butum aria nyasuhw wigah um abrudok wabur. Aria douk enyen nyasuhw wigah aria ihiburmorim agundok roubur um bani debebur um bani agundok atap bato iruhw um douk aragam atin abom. Aria shasuhw wigah um, ababur douk rourouburi abom hurukatin um 2,200 kilomita. ¹⁷ Aria enyen nyasuhw wigah um narub shopunek. Aria agundok atap bato iruhw um douk hurukatin um 144 mita. Amudok butum enyen nyasuhw wigah um arbudok narub iri douk amudokmori um douk arpesah apa shasuhw wigah um eshudok eneshenesh iri um. ¹⁸ Aria arbudok narub douk shenekarub abrudok utabor atubor douk shahwarabor um jaspah iri. Aria wabur ababur kanak shenekabur

shakwu yopuri gol douk rabuhi aria ratrugun kabi wenyirumori. ¹⁹ Atapirub um arbudok narub douk shenekarub um shunek narub um abrudok wabur iri douk shenekarub dodog. Aria shaginothwarub sabaibori sisigibor yopubori utabor douk shatorabor debeibori utabor iri.

Marik iri utom douk makus atap um masuhw arbudok narub iri douk jaspā.

Aria magiguk iri douk bluporeimi douk shahwaram um sapaia iri.

Aria biobor atum iri douk shigorihwimi douk shahwaram um aget iri,

aria nubatibor iri douk grinporeim douk shahwaram um emeral iri.

²⁰ Aria anas wisi-ibor iri douk anabigim um owishiborim

aria anabigim um shagarihwim.

Amam douk shahwaram um sadonikis iri.

Aria anas wisi-ibor iri douk owishiborimi douk shahwaram um konilian iri.

Aria namba 7-im douk akitothimi douk shahwaram um krisolait iri,

aria namba 8-im douk sikim grinporeim douk shahwaram um beril iri.

Aria namba 9-im douk anam sikim akitothimi douk

shahwaram um topas iri,

aria namba 10-im douk anabigim um grinporeim

aria anabigim um akitothimi iri.

Aria amam douk shahwaram um krisopres iri.

Aria namba 11-im douk anam sikim bluporeimi douk

shahwaram um haiyasin iri,

aria namba 12-im douk anam sikim owishi-
borimi utom

shahwaram um ametis iri.

²¹ Aria eshudok 12-poreish duahas douk shenekesh shakwu 12-poreib shigorihwibi de-beibi weiyoub douk shatarub debeibori utabor iri. Aria eshudok duahas atin atin shenekesh shakwu atut atut um debeigwi weiyoubig natog douk shahwarog um pel iri. Aria ahudok debeihi yah douk hape abrudok debeiburi wabur iri douk shenekah yopiri gol aria ahah hape kabi wenyir^{21:21}um.

²² Aria eik madae itik Iruhin ananit debeiti urupat tutao abrudok wabur uwe, uwok. Um maresh? Debeini Iruhin anan douk Dodogowin abom nabo ihishmorim eshudok shabuhuk iri nani Nugaen Sipsip amam kanak hape kabi Iruhin ananit urupat um. ²³ Aria abrudok wabur mour ta mare enen um wah hutao hobur um o wabin aun wanyukehin aria nustrugun um, uwok. Um maresh? Agundok douk Iruhin dodogowin aria natrugum abom um, agagun kanak ta nunek ihigunmorim um abrudok wabur butrugun aria bogaragun. Aria shopunek, enyudok Nugaen Sipsip enyen kanak nyabuhi kabi douk lam um aria nyenekagun bogaragun abrudok wabur. ²⁴ Aria ihishmorim arpesh shape sabaigosi nahobigos iri ta abrudok wabur butrugun-umesh aria eshesh ta shunatrugun aria shurahaen. Aria amam king douk

^{21:21} **21:21** Arudok gol arar douk anar sikir. Arpesh shutrur um, esheshis nabes ta sunak dukwotis sunakuk kabi shape numun urupat shenek narubumat glas iri shatik glas nabes arukwutis shatik aduk um.

hape agundok atap iri ta hurao amamibor utabor buni ihishmorim eneshenesh amamish yopishi eshudok hunak huwish abrudok wabur um hakri hutuk Iruhin ananin nyeigur nyuto iruhw. ²⁵ Aria nyumneh, abrudok waburish duahas ta shunejik shupe namudok atin. Um maresh? Agundok weibus ta mare anabus, uwok. ²⁶ Aria ihishmorim arpesh shape ihigos-morim nahobigos iri ta shurao esheshibor utabor buni yopihi jah shuwish abrudok wabur um shutuk Iruhin ananin nyeigur nyuto iruhw. ²⁷ Aria ihishmorim eneshenesh shabosusih iri yoweishi eshudok shuni eshudok arpesh douk shenek eneshenesh yoweishi inahos iri, shuni eshudok douk shenek abraenyih aih iri, shuni eshudok douk shenek rohwa um kupaishi iri ta mare shuwish abrudok wabur, uwok. Aria eshudok arpesh douk esheshish nyeiguhw shetem Nugaen Sipsip enyenyik buk iri eshesh atish ta shuwish abrudok wabur. Okwudok buk okwok douk eshudok arpesh douk ta shupe wosik abom ihih nyumneh iri esheshish nyeiguhw shetmokwi.

22

Worubibar Abar Bani Shurkwip Peir Rowog Iri Douk Ta Arpesh Shishoh Aria Shupe Wosik Abom Iri Ihih Nyumneh

¹ Aria enyudok ensel wata shopunek nyeyabige anab debeibi worub. Abudok worub shopunek douk bogarab abom kabi douk wenyir ratrugun um. Aria arpesh shuwok abar abudok worub iri ta shupe wosik abom ihih nyumneh. Abudok worub douk batobe iri agundok

enyudok debeinyi wagitur douk Iruhin nani Nugaen Sipsip hatemenyi nyakus um. ² Aria abab bau banak orokohunih um ahudok debeihi yah douk hape abrudok wabur iri. Aria enesh rowos shatao wobuwobur abudok worub. Aria eshudok arpesh douk shuwok shurkwip peir eshudok rowos iri ta shupe wosik abom ihih nyumneh. Aria shurkwip apa peir ihimorim aub enen kwar. Aria esheshis shus ta sunek ihimorim eneheneh arugeh henekesh iri arpesh douk shape ihigosmorim nahobigos iri shutogur yopish. ³ Aria ihishmorim eneshenesh yoweishi inahos eshudok shuni arpesh douk Iruhin nakri adur iruhw abom um nakri wokumesh iri ta mare enesh shukus abrudok debeiburi wabur, uwok.

Aria Iruhin nini Nugaen Sipsip amamin debeinyi wagitur ta nyukus abrudok wabur. Aria eshudok douk shenek Iruhin ananin mour iri ta shupe shunek lotuman. ⁴ Eshesh ta shutik ananig yamag aria ananin nyeigur ta nyutem esheshish domaesh. ⁵ Aria agundok weibus ta mare anabus aria eshesh ta mare shuhem enesh lamhos, uwok. Aria mour ta mare enen um wah hutao um hunekagun juwehos-igun um, uwok. Um maresh? Agundok douk Debeini Iruhin natrugun abom um ta nutrugun-umesh. Aria eshudok douk shenek ananin mour iri ta shupe debeimi king-omi ihih nyumneh.

Jisas Hurukatin Um Nunaki

⁶ Aria enyudok ensel nyakripe nyakri, “Enyudok ihinyumorim baraen douk nyak nyenyem okwudok buk iri douk adurin atin abom. Aria enyen douk wosik abom um ihishmorim arpesh

shumneken aria shusuhwen dodog shugipeshen. Aria debeini, anan douk Iruhin douk apa nohur amam profet um hunak hukriפש ananin baraan iri. Anan neshopok ananin ensel nyanaki um nyiyabig ihishmorim shenek ananin mour iri um ihishmorim eshudok eneshenesh douk hurukatin um shutogur iri.”

⁷ Aria Jisas nakri, “Mnek, eik douk hurukatin um inaku itogrumep! Aria eshudok arpesch douk shugipesh Iruhin ananin baraan nyetem okwudok Buk iri douk nyakrium eshudok douk ta shutogur iri, eshesh ta shunadudareh.”

⁸ Aria eik Jon, eik kanak yemnek ihinyumorim baraan aria yatik ihishmorim eshudok douk yeshem okwudok Buk iri. Aria douk yemnek enyudok baraan aria shopunek yatik eshudok ihishmorim eneshenesh iyoh aria yabuh yoduk ohrubus hurukatin um enyudok ensel douk iganigadae nyape nyeyabige ihishmorim eshudok iri enyenyiruh yeriweruh aria yakri inek lotuman. ⁹ Aria enyen nyakripe nyakri, “Nyak mare nyunek lotu um eik, uwok! Eik yani nyak wani nyakim ashukenyim amam profet, mani ihishmorim arpesch douk apa shagipesh enyudok baraan douk nyetem okwudok Buk iri, apak ihishmorim douk munek atin mour iri. Douk namudok aria nyak nyunek lotu um Iruhin atun!”

¹⁰ Aria enyen nyakripe nyakri, “Nyak mare nyubeshuk enyudok Iruhin ananin baraan douk nyetem okwudok buk iri, uwok. Um maresh? Abudok nyutob douk Iruhin nakri nunek eshudok douk shetem okwudok buk iri shutogurum

douk banaki hurukatin. ¹¹ Douk namudok aria eshudok arpesh douk shenek yoweishi inahos iri ta shupe um shunek yoweishi inahos namudok atin. Aria eshudok douk shenek eneshenesh shanabosusih abom iri yoweishi inahos iri ta shupe um shunek yoweishi inahos namudok atin. Aria eshudok arpesh douk shenek yopihi aih iri ta shupe um shunek yopihi aih namudok atin. Aria eshudok arpesh douk shape Iruhin ananish atish iri ta shupe ananish atish abom.”

¹² Aria Jisas nakri, “Mnek! Eik douk hurukatin um inaku. Aria eik ta iraougu eshudok um iko ihishmorim arpesh atin atin um iwanamesh ihishmorim eneheneh yopihi o yoweih aih eshesh riguk shape shenekeh iri. ¹³ Douk seiwok baugos um ihishmorim eneshenesh eshudok madae enesh shupe uwe, aria eik yape. Aria kweipon shopunek eik ta ipe arigaha hugiguk iri nyumnah hutogur.

¹⁴ Aria eshudok arpesh douk apa shanokwrap esheshih rupeh hatogur yopih iri, eshesh wosik ta shunadudareh. Um maresh? Eshesh ta shurao big um shuwok epudok shurkwip douk peir enyudok rowog douk ta shupoh aria shupe wosik abom ihih nyumneh iri. Aria shopunek, eshesh wosik ta shunak shuwish abrudok waburish dua-has aria shuwish shupe numun. ¹⁵ Aria eshudok douk shenek yoweih abraenyih aih iri shuni eshudok douk shenek ouruh aturuh iri, shuni eshudok douk shenek enenyenen um sabagwiruh iri, shuni eshudok douk apa shenek wehrur um iri, shuni eshudok douk shabo kupaishi shagok iri, shuni eshudok douk shenek lotu um madae

adurimi god omi iri uwe, shuni ihishmorim arpesh douk esheship urkwip panawasham um ehudok aih um shunek rohwa um kupaishi arpesh um aria shagipesh shenekeh iri, eshesh ta mare shuwish abrudok wabur, uwok. Eshesh ta shupeik aduk.

¹⁶ Aria douk eik Jisas yeshopoku enyudok eikin ensel nyanakumogu ipak aria nyakripep um enyudok enenyenen douk nyetem okwudok buk iri um ipak Iruhin ananish arpesh. Eik douk Devit ananin barhonin douk yakitaki ananip awirop iri. Aria eik douk okwudok unuk douk kwanahwar um shuduwi kwatrugun abom iri.”

¹⁷ Aria Iruhin ananin Mishin nyani Nugaen Sipsip enyenyik irohukwik^{22:17}shakri, “Yowi!” Aria eshudok arpesh douk shumnek enyudok baraen iri shopunek ta shukri, “Yowi!” Aria eshudok arpesh douk abar baesh iri ta shunaki aria shuwok abrudok abar douk ta arpesh shubroh aria shupe wosik abom ihih nyumneh iri. Ababar Iruhin ta nukeshabar meyoh. Eshesh ta mare shutorabar, uwok.

Nyagiguk Iri Baraen

¹⁸ Aria eik Jon yakri ikripesh enyudok dodogowinyi baraen ihishmorim arpesh douk shemnek Iruhin ananin baraen douk nyetem okwudok buk iri. Enyudok baraen douk nyakrium eneshenesh eshudok douk ta shutogur iri. Baraen enyudok. Ta enen arpen nyuwem

22:17 **22:17** Enyudok baraen um Nugaen Sipsip enyenyik irohukwik douk nyakri wobuwobren baraen um Iruhin ananish arpesh.

enen kupainyi baraeen shopunek um enyudok baraeen douk eik yenyem nyetem okwudok buk iri um, Iruhin ta nunek yoweishi abom eshudok shutogrumen namudok. Eneshenesh yoweishi eshudok douk okwudok buk kwakriyesh iri ta shunek arpeshe shumnek debeiri eriger iri, Iruhin ta wata nenekesh um enyudok arpen enyenyin yoweinyi poe aria ta shutogurum enyen atin.

¹⁹ Aria shopunek, ta enen arpen nyukri nyukutukuk enen Iruhin ananin baraeen douk eik yenyem nyetem okwudok buk iri um, Iruhin ta mare nukri wosik um enyen nyunak nyuwish nyunadi anep shuruwep douk peir enyudok rowog douk ta arpeshe shupoh aria shupe wosik abom ihih nyumneh iri, uwok. Aria enyen ta mare nyuwish nyupe abrudok ananibur yopuburi wabur douk baraeen nyetem okwudok buk iri nyakriabur iri.

²⁰ Aria anudok arman douk nakripap um ihishmorim eneshenesh eshudok douk shetem okwudok buk iri nakri, "Adur atin, eik douk hurukatin um inaku!"

Adur, Debeini Jisas, nyak nyunaki!

²¹ Aria eik yakri Debeini Jisas nini ipak ihishmorim Iruhin ananish arpeshe pupe aria nutaurumep meyoh. Adur.

IRUHHN ANANIN BARAEN
The New Testament in the Coastal Arapesh dialect of
the Bukiyip language of Papua New Guinea
Nupela Testemen long tokples Coastal Arapesh long
Niugini

copyright © 2003 Wycliffe Bible Translators, Inc.

Language: Coastal Arapesh (Bukiyip)

Dialect: Central

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not sell this work for a profit.

 You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-05-07

PDF generated using Haiola and XeLaTeX on 21 Feb 2024 from source files dated 31 Aug 2023

d1ef5a4e-3e53-5ef0-80e4-4cd8770ca6e6